



✓  
03059

道光乙巳首夏

前  
明  
忠  
義  
男  
傳

墨花齋聚珍版




春秋之外無信史孟子曰盡信書則不如無書蓋史失則  
 誣自古已然後世避忌紛更史官之筆益多掛漏惟夫汲  
 古之士閉戶窮經响中了無成見往往搜羅軼事發微闡  
 幽其所表見實有以正前史之訛而補其闕此汪君忠義  
 別傳之所為作也其平日篤志潛修讀書懷獨行君子之  
 德義不苟合當世詞章之學雅所不屑獨於往哲之芳躅  
 足以翼世教明大義者必綜覈其本末而表章之嘗見有  
 明一代忠義士多於前古正史所載綦詳然其間子衿處  
 士鄉社布衣以及深山之野人幽閨之碩女從容而就義

前明忠義別傳

序

者不可勝數史多闕焉乃歎曰知人論世儒生之責也抱  
 殘守缺學者之羞也且前代迄今百有餘歲相去未遠不  
 以此時考訂而傳述之將終聽其泯泯乎於是廣稽博採  
 有美必揚無微不著積數十寒暑而成一書彷彿太史公列  
 傳體凡如千卷雖窮巷幽人亦必詳明刊晰為立一傳令  
 觀者忠義之氣勃然而興大半皆正史所未及其筆意簡  
 潔明淨離奇斷續而又丰神宕逸慷慨淋漓殆善學龍門  
 而入廬陵之室者歟余畱寓須江得與汪子遊幸投針芥  
 出其所為書相示余受而讀之知其意不在文章也於是

不揣固陋而爲之序



金沙同學弟王斌拜撰

前明忠義別傳

序

二



先生是書經數十寒暑始克有成其初論次諸公時勢亦隨所見而書於各朝次第本末先後未及按部排纂每傳中提案處端緒原委不無層見疊出授梓時始編次朝代故有不及刪正者然文體已成裁剪殊難讀者諒之 先生推誠待人乃爲刻工所給寫鑄易手版多不一司馬王公捐貲補換始成全璧佩茲盛舉用識不謬門人朱辨賢等謹識

前明忠義別傳

識

前明忠義別傳跋言

甲辰之秋余與趙心農司授有議擺寒溪先生成仁譜之舉工甫竣秦君味芸以史外示余曰此書備載前明一代忠烈雖有刊本而坊間售買甚抄急宜廣之以闡潛德遂與味芸訂約各集錢若干緡命梓人依照原書擺字並易其名而標之曰前明忠義別傳俾閱之者展卷竦然以見忠節之炳若日星永昭垂于竹簡云道光二十五年仲春鎮洋邵廷烈識書

前明忠義別傳

跋

忠節之炳若日星永昭垂于竹簡云道光二十五年仲春  
其各而標之曰前明忠義別傳俾閱之者展卷竦然以見  
忠烈雖有刊本而坊間售買甚抄急宜廣之以闡潛德遂  
與味芸訂約各集錢若干緡命梓人依照原書擺字並易  
其名而標之曰前明忠義別傳俾閱之者展卷竦然以見  
忠節之炳若日星永昭垂于竹簡云道光二十五年仲春  
鎮洋邵廷烈識書

前明忠義別傳

目錄

卷二

方孝孺

附方孝友等

鐵

鉉

附高寗等

齊泰

黃子澄

卷二

胡閏

黃觀

前明忠義別傳

目錄

練子富

卓敬

景清

葉希賢

附廖平

程濟

附高翔

卷三

劉球

于謙

孫燧

沈練

楊繼盛

海瑞

卷四

張振德

姬文胤

石有恒

張鈐

何廷魁

崔儒秀

王三善

附田景澱

卷五

萬燦

前明忠義別傳

目錄

丁乾學

附吳裕中

楊漣

附江文言

左光斗

顧大章

附弟大武

魏大中

袁化中

附夏之令

卷六

李應昇

繆昌期



黃尊素

周宗建

高攀龍

周順昌

劉鐸

卷七

劉之綸

費彥芳

鹿善繼

前明忠義別傳

阮之錫

孫承宗

卷八

衛景瑗

徐世淳

王璧

蕭漢

蔡懋德

卷九

附顏佩章等

附尹伸

附陸夢龍

附薛一鶚

目錄

郝景春

附王瑞耕

蔡道憲 附林國俊等

孫傳庭

汪喬年 附傅宗龍

賀逢聖 附徐學顏等

卷十

宋之馮 附姚時中

嚴覺 附張化樞

高名衡

鄧藩錫

前明忠義別傳

劉熙祚

何燮

卷十一

盧象昇 附楊陸凱等

呂維祺 附呂維祐

張克儉 附鄒白廣

劉廷傳 附劉廷石筆

張大同 附萬元亨等

范淑泰

卷十二

范景文

倪元璐

李邦華

王家彥

孟兆祥

子章明

施邦耀

卷十三

凌義渠

前明忠義別傳

吳麟徵

周鳳翔

馬世奇

附成德

劉理順

汪偉

吳甘來

王章

卷十四

陳良謨

目錄

申佳胤

金鉉

兩魏合傳

兄學淵

弟學濂

劉文炳

鞏永固

附申湛然等

卷十五

張令

附女將秦良玉

周遇吉

邵宗元

附何復

張羅彥

附張羅俊等

前明忠義別傳

目錄

金毓嗣

附金振孫等

李昌齡

附尤世威等

卷十六

廬州忠義諸公合傳

盧謙

胡守恒

錢策

趙興基

程楷

趙之璞

鄭元壽

金玉度

喬允燾

張國政

劉鉉

江源洞

黃衷赤

朱應珍

蔡世和

吳士任

趙嗣蕃

葛一本

路法寬

吳之默

錢振綱

樊孔學

張四哲

徐奇

前明忠義別傳

目錄

陸合新

梅國秀

彭之年

李逢期

宋禎武

沈志傑

周呈芳

曹同中

張弘任

馬應奎

黃克嘉

高翰冲

張弘化

楊維嶽

卷十七

焦源溥

附焦源清等

王與胤

附王象復等

張秉純

左懋第

附陳同極等

前明忠義別傳

目錄

八

周鏞

雷纘祚

卷十八

史可法

附許謹等

何綱

附任民育等

吳爾纒

附曾應亨等

張伯鯨

乙邦才

附馬應魁等

卷十九

黃得功

高倬 附黃端伯等

袁繼咸

卷二十

金聲 附江天一等

溫璜

吳應箕

凌駟 附凌潤生

陳子龍 附徐孚遠等

卷二十一

前明忠義別傳 目錄

黃淳耀 附黃淵耀等

徐汧 附徐枋等

華允誠 附華尚濂等

侯峒曾 附侯岐曾等

楊廷樞

卷二十二

徐石麒 附李成等

劉宗周 附王毓著

祝淵

祁彪佳

王思任

陳龍正

陳潛夫

卷二十三

吳易

附孫兆奎等

張國維

附王之仁等

吳繼善

附季曾貫等

王行儉

前明忠義別傳

目錄

陳士奇

附王錫等

卷二十四

閻應元

附陳明選等

鄧雲程

林汝翥

林銜

王養正

附夏萬亨等

黃道周

附賴雍等

卷二十五

路振飛



詹兆恒

陳子壯

附張家玉等

鄭爲虹

附黃大鵬

熊化

堵胤錫

孫臨

卷二十六

熊汝霖

曾櫻

前明忠義別傳

目錄

張肯堂

姜曰廣

吳鍾巒

王士和

附胡上琛等

楊廷麟

附劉同升等

何騰蛟

萬元吉

卷二十七

揭重熙

附傅鼎銓

瞿式耜 附張同儼

楊畏知 附王運開等

卷二十八 布衣諸公合傳

許 琰

許重玉

賀向峻

王介休

王明灝

謝 球

前明忠義別傳

目錄

三

王 湛

馬純仁

王合輔

鄧思銘

袁啓觀

殷 淵

卷 司石盤

水滸公合傳

李若葵

王 襄

曹天肅

謝 球

王義

謝官錦

彭了凡

理增和

劉孔暉

附馬三立等

馬如蛟

附黎弘業等

宋應亨

附姜澗里等

宋學洙

附鄧謙

王文漢

前明忠義別傳

目錄

許文岐

卷二十九

許布衣

鄧歐石三布衣

卷三十

遺臣諸公合傳

姜採

熊開元

黃周星

朱永慶

卷三十一

史八夫人

兩女將軍

沈雲英

劉淑英

卷三十二

國變難臣鈔

前明忠義別傳

目錄

十四

前明忠義別傳目錄終

前明忠義別傳卷一

無爲汪有典訂頌纂

方正學先生傳

附方孝友等

先生諱孝孺字希直一字希古號遜志又稱小韓子浙江甯海人高祖重桂鄉貢進士曾祖子野祖炯元鄞縣教諭父克勤濟甯太守事見循吏傳同母兄孝聞異母弟孝友祖母葉母林庶母董仲父克家克家子孝復以奏請減賦謫甯夏慶遠衛軍姑少卿盧原質母妻鄭子中憲中愈女二壻王稔死國事忠文公禕之孫先生生平傑然必爲君

前明忠義別傳

卷一

子賤文章而貴道德耻刑罰而尊教化發明聖訓敷陳王道天下皆以孟軻韓愈復生執贄從遊號爲方氏朋友門人者甚衆洪武十五年以薦召高帝一見奇之謂太孫曰此莊士當老其材輔汝遣還鄉二十五年又薦召至高帝曰今非用孝孺時稍擢漢中府學教授獻王師事之扁其讀書之室曰正學學者稱正學先生恭閔帝立召入翰林直文淵閣被殊眷是時帝銳意用先生先生亦欲佐天子建太平之業做古周禮周官次第更定會燕王反南北用兵未及設施而國事去矣嗚呼王政之不行於今二千餘

年矣恭閱承高帝戡亂嚴威擊斷重典頻行之後濟以寬仁一二年間路不拾遺童穉彬彬禮讓謂非仁義旣行之效乎天不悔禍釁起強藩酷虐殘殺烈於跼蹐自壬午篡奪以還天地元氣鑿喪略盡僅一仁宗稍稍煦咻而年短祚促譬之積惡之家子弟成材率多摧折不善降殃理固然歟爰是以降王澤絕息繼體之君類皆信用僉壬戮辱忠良姦瑄權相疊柄太阿雖有救時善政功效確然皆出於申商刑名之學狹隘酷烈生理益以剗削又况一變而爲叢勝之形再變而成鉤黨之勢士怨民叛財盡國糜前明忠義別傳

卷一

二

一亡而不可復振矣小夫豎儒每咎先生不瀟恭閱篤親之誼夫燕王驕悍就國之初卽陰蓄亡命修武備快快耽耽已非一日舉兵南下假清君側之名蚤削天王之號司馬之心路人知之矣當此之時含齒戴髮且思奮挺操戈急難君父周公之誅管叔夫豈得已大義滅親名正言順卽奈何以是病先生乎且燕王旣篡齊王榘親兄弟也奪衛削藩不遺餘力豈不可行之於建文者獨可行之於永樂乎至高煦效尤則謂侍臣謀國不當以黃子澄爲戒此非其良心之忽動恕已而量人固其陰狡之性深周身

之防慮廷臣黨煦爲齊慶封之言耳非所謂觀物則智自  
斷必厲者歟况夫建文四年屬之洪武興宗廟謚還以懿  
文誣死父讐死兄抑又何心豈皆先生有以致之歟先生  
嘗謂道之於事無乎不在列爲二十八箴謂化民必自正  
家始作宗儀九篇謂先王之治列德化而後政刑作深慮  
論十首他雜著又數十百篇凡以悼王道之凌遲還斯民  
於三代也孔子謂王者必世而後仁先生事恭閔纔數年  
耳顧以迂濶責之事後成敗之論何足據哉燕王兵至京師  
宮中自焚先生持衰服晝夜號哭鎮撫伍雲等執以獻先  
前明忠義別傳

卷一

三

生大罵不屈繫獄遣人諭意不從旣而議頒卽位詔於天  
下問左右誰可代草者皆舉先生乃召出衰杖哭闕下聲  
徹殿陛燕王降榻勞曰先生何自苦予法周公輔成王耳  
先生曰成王安在燕王曰渠自焚死先生曰何不立成王  
之子燕王曰國賴長君先生曰何不立成王之弟燕王曰  
此朕家事先生無自苦授筆札曰詔天下非先生草不可  
先生大書燕賊反數字擲筆於地且哭且罵曰死卽死耳  
詔不可草燕王曰汝不顧九族乎先生曰便十族奈我何  
哭罵益厲燕王大怒據宗支盡抄之每收一人輒示先生

先生罵益厲九族旣戮則及母黨妻黨交游門人爲十族  
當此之時坐死者八百七十三人外親之外親族謫戍絕  
徼者復千百餘人七日而後磔先生先生罵聲不絕至死  
乃已時年四十六孝聞已前死孝友就戮時先生目之淚  
下孝友口占一詩曰阿兄何必淚潛潛取義成仁在此間  
華表柱頭千載後夢魂依舊到家山士論壯之以爲不愧  
先生之弟姑子盧公原質字希魯洪武戊辰進士第二人  
官太常少卿坐黨族其家先是燕王以德慶侯廖永忠之  
孫鏞與銘嘗受學先生令召之先生怒曰汝讀幾年書還  
不識箇是字先生旣致命鏞銘拾遺體葬聚寶門外山上  
甫畢亦見收方燕兵勢迫先生自分必死爲絕命詞曰天  
降亂離兮孰知其由姦臣得計兮謀國用猶忠臣發憤兮  
血淚交流以此殉君兮抑又何求嗚呼哀哉兮庶不我尤  
妻鄭與二子憲愈先自經死女二年俱未笄被逮過淮相  
與投橋水死壻王公稔字叔豐受業先生與鏞銘等謀葬  
事坐黨逮繫燕王念其祖死國特宥免欲用之辭不就痛  
念先生名蹟日就湮沒搜輯其學行幽潛生平始末爲家  
傳行狀並方氏遺文爲侯城集卒傳於世初孝復之謫戍



也。搆宗圖以行先生赴難時抄民不抄軍故孝復軍支幸脫洪熙間孝復子琬以赦歸里始克主先生祀謝公鐸詩孫枝一葉是君恩謂是也。或謂爲典史魏澤匿先生幼子德宗言謬矣而他本所載余學夔並俞允育養先生遺亂後有爲南昌司訓者亦非也。其詳具載崇正閣臣未國楨所輯先生傳後。

外史氏曰嗚呼秦政赫連勃勃振古之窮克也然未嘗有十族刑蓋自開闢以來忠義屠戮之慘至明爲極而燕王實肇其端死難亦惟明爲盛而先生特冠其首方燕王之

前明忠義別傳

卷一

五

南下也姚廣孝啟之曰殿下入京慎勿殺方孝孺殺此人讀書種子絕矣嗚呼惟先生不避十族之誅讀書種子乃所以不絕也廣孝輩烏足以知之哉朱國楨曰方先生以聖門之學擅蘇氏之才高皇帝養之建文皇帝用之庶幾可興教化而遭時大阨退不得爲巢由進不得爲周召卽求平世卿士不可得則有成其爲方先生而已或訾以更改制度爲無成或憐以激烈沉宗爲太過噫太祖之制誠可無改也直易視北平以潤色太平爲得意謂君臣千載一時不可失耳乃建文知遇如此謀人之國至於極敗不

一明目張膽抗言之而黯黯付此身尺組刀圭間比於溝  
瀆成何局面金陳和尚兵潰城破俟殺掠稍定然後出曰  
今日明白死後世必有知我者一武夫立志猶爾何况先  
生允忠臣孝子遇大不幸之時之事一有顧瞻便生退轉  
則所謂叩頭乞餘生者何所不至而豈先生之本色哉至  
溫陵云建文止能長養死難之人才而不能長養輔弼之  
人才是天地能生虬枝鐵幹不能生黍稷稻粱也且三四  
年中何長養遽便得此其意蓋指高皇而又姑隱其辭務  
求可喜暗寓推敲另是世間一說存之不論可也方祠碑

前明忠義別傳

卷一

六

曰當夫金川啓鑰皇祚頓移固曰此家事曰周公輔成王  
成王而既逸矣新主舊臣不得不死文皇不得不殺先生  
以一死自誓哀麻號哭計不反顧文皇以必殺之心脅以  
不卽殺之勢先生卽欲自死快死亦何可得是八百七十  
三人者斷肢交首於前愈殺愈勁愈殺愈勁如墮山之  
丸勢不得中止蓋至血肉已盡形影都消死者浩然死死  
者忿然桀然怒不少殺而其計其威固已窮矣窮則悔悔  
則思亦甯不坦焉若喪曰奈何以家事累若曹而特不可  
以告人萬機之暇進而孝陵轉而東又四顧天下踏踏蠢

蠢敢非而不敢書敢書而不敢出終無以釋然於天下於是修文競武遷都掃口終其身不敢自逸甚至殉榆川之役曰吾本無利於天下諸君子何自苦爲蓋三百年來恬熙無事狩而還斷而續追唐虞三代之盛則文皇帝之功而先生及諸死節者憤激之力也夫忠臣孝子所以糜爛不回者豈惟千秋日月之名其心謂不如是天軸絕地維折人類滅故決然以一絲爲繫期於安天下而止今文皇帝之功可以謝太祖卽可以謝成王與先生遺詔特祠正是繼善之大而先生以二死安天下其魂魄所之太虛來前明忠義別傳

卷一

七

徃任夫自逃自續與後之人自憐自歌自碑自記而終無怨於殺者夫張許不能昌唐文陸諸君子不能留宋而先生獨以聚寶一片地固有明萬世之業豈非亘古亘今忠臣之第一乎

予次正學先生傳本之鄭端簡吾學編其他一切制行概爲削去獨標死難一節從其重也凡予所論次諸先生傳悉倣此例故較他本記載不無掛漏至先生幼子德宗抄沒時魏澤匿之余學夔俞允遞養之此吾學編所未詳載予得之他本私喜先生血胤不絕故特附記

之及讀朱氏國楨所輯遜國臣傳辨先生後嗣甚悉則所謂德宗者乃子虛烏有而先生之血胤竟絕矣遂依朱氏易之蓋先生以十族延爭時止知萬古之綱常爲重何暇顧一己之嗣續正不必曲爲假借以有血胤爲先生幸也伯夷叔齊何嘗有子孫香火哉朱氏之言曰方氏旣無噍類唯克家子孝復於洪武二十年湯國公和城海上加賦甯民毅然赴闕奏減謫甯夏慶遠衛軍攜宗圖以行先生死難時止抄民不抄軍故孝復軍支幸脫洪熙逢宥孝復子琬援例抱宗圖告奉戶部浙字

前明忠義別傳

卷一

八

一千一百二號勘合調海門衛軍尋釋爲民由是方氏之的亂始歸成化十八年方石葺先生遺稿謁祠琬孫方志淵出迎方石喜先生有後且由軍赦回故手書律詩一首贈淵內有孫枝一葉是君恩之句遺扁尙存歷代世守乃志淵故有仇人曰葉口者遊於海鹽得見鄭端簡恣其說遂入傳中然猶下一或字或之者疑之也金采者軍冊之訛也而淞江人俞斌原竈丁販布於甯欲脫其籍且艷慕卹錄結黜生復祖吾學編竊改縣志於名宦魏澤下摘去黃萌三行插入托孤一段指幼子

名德宗捏出俞允任免名色求弇州作復姓記淞江人  
益張大其事造祠立碑纂歸宗錄至甯海溷告侵奪知  
府洪都淞人又主其說訟者數年前後提學副使王畿  
周延光查明黜革方氏揭奏於朝始定蓋天啓四年事  
余在政府親得而正之所謂遺族赦還京者真實錄也  
然斌之後冒廩冒貢而真方氏幾掃地矣偽之足以亂  
真如此又先生身後之一阨也

前明忠義別傳

卷一

九



元明忠義別傳卷一  
卷一  
俞允任免名色求弇州作復姓記淞江人  
益張大其事造祠立碑纂歸宗錄至甯海溷告侵奪知  
府洪都淞人又主其說訟者數年前後提學副使王畿  
周延光查明黜革方氏揭奏於朝始定蓋天啓四年事  
余在政府親得而正之所謂遺族赦還京者真實錄也  
然斌之後冒廩冒貢而真方氏幾掃地矣偽之足以亂  
真如此又先生身後之一阨也

公諱鉉原色目人居鄧州洪武時以國學生拔授禮科給事中賜字鼎石遷山東叅政陞兵部尙書建文元年秋七月燕王棣反削去建文紀年仍稱洪武三十二年殺王臣署官屬誓師南下是時離高帝勘亂之日久遠海內蕩平文恬武嬉將不習戈甲諸武臣子爲大帥者皆雍容講藝恥言兵事耿炳文稱老將至是北征李景隆代之景隆膏粱豎子寡謀而驕未嘗習兵見陣妄自負文武才統兵五十萬與燕兵戰輒敗棄其師遁公與叅贊高公巍出臨邑

前明忠義別傳

卷一

十

誓酒同盟起集兵丁固守濟南燕兵射書入城招降濟陽書生高賢甯教諭王公省門人也在城中作周公輔成王論答射堅守不肯下當此之時燕兵攻之急城且壞公則夜募監帛裹以葦薦晝白纒若城而潛令人補築之燕兵堰水灌城眾大懼公曰無恐計且破之於是撤守具令人登陴哭而求降出千人伏地僞請命燕王大喜謂諸將曰此中原要會得此可斷南北卽不下金陵晝而自守徐圖江淮可以得志於是退軍率數騎渡橋直至城下公則懸鐵板城門上伏壯士圍堵中戒俟燕王入城時呼千歲卽

下板壓殺之比燕王入門門中遽呼千歲板急下傷馬首  
燕王大驚易馬而走走至橋伏發撤橋橋不可動乃得逸  
去於斯時也燕王之不死者僅如髮旣免則大怒復合圍  
以礮擊城公書高皇帝神牌懸其上遂不敢擊出奇計毀  
燕兵攻具屢敗之相持三月燕王憤甚計無所出遂引兵  
去公設宴天心水面亭犒問辛苦述賦賡歌激發忠義燕  
兵畏之遂不近濟南已而抵靈壁至宿州公率兵踵其後  
邀擊大勝於小河中原震動燕王欲棄師會中官有招者  
而淮上諸將亦連敗京師遂不守公擁殘兵在淮南爲人  
前明忠義別傳

卷一

十一

州關索嶺建文帝卽位歸田里上書論政事其一言親藩  
帝深奇之語略見卓公敬傳燕兵起從李景隆叅贊軍務  
復上書言臣願使燕披忠膽大陳義禮曉以禍福及親親  
之誼遂遣往燕自稱國朝處士臣某上書燕國大王其詞  
曰志慕仲連子善與人排難解紛名世不朽我太祖升遐  
遺詔內外臣民同心輔政我聖明天子嗣登寶位誕布維  
新之政下養老之詔天下感戴奚啻考妣朝野皆曰內有  
聖明君王外有骨肉藩翰帝王之治可待不意大王與朝  
廷有隙張皇三軍抗禦六師竟不知其意何出在朝諸臣  
前明忠義別傳

卷一

三

執言仗義以順討逆臣以爲動干戈孰若和解使帝者復  
帝王者復王君臣之義大明骨肉之親愈厚臣所以得奉  
明詔來見大王者何哉誠夙許太祖生當殞首死當結草  
故求盡一言卽頸血汚地不惜耳昔周公聞流言卽避位  
居東若大王收諸始謀者擒送京師或戮而奏聞或解其  
護衛或質所愛子孫釋骨肉猜忌之疑塞讒賊離間之口  
須當與周公比隆乃慮不及此遂傳檄遠邇大興甲兵襲  
奪疆宇任事者得藉口以爲殿下假誅左班文臣實欲效  
漢吳溥倡七國以誅晁錯爲各家必自毀然後入毀之恐



有奸雄豪傑鳩集無賴因時乘隙率衆數萬突起而橫擊之萬一有失大天獲罪先帝矣今大王據北平取密雲下永平襲雄縣掩眞定易若建瓴但自興兵以來經今數月尚不能出區區葦爾一隅之地較以天下十五而未有一焉大王將士殆亦疲矣况朝廷天下無限之師大王以一國有限之衆應之大王同心之士大約不過三十萬大王與我聖天子義則君臣親則骨肉尚生離間之疑况三十萬異姓之士可保終身困迫而死於殿下乎大王信臣言上表謝罪按甲休兵朝廷寬宥再修親好天意順人心和

前明忠義別傳

卷一

三

太祖在天之靈亦安矣不然執迷不回大喪未終毒與師旅恐與伯夷叔齊泰伯仲雍求仁讓國之義徑庭矣幸而兵勝得成後世公論謂何倘有蹉跌取譏萬世於是時也追復臣言可得乎巍白髮書生蜉蝣微命生死不懼者但久蒙太祖教養無能補報洪武十七年旌表迂臣孝行臣竊自負旣爲孝子當爲忠臣死忠死孝臣至願也書再上不報景隆兵屢敗自拔南歸二年五月遇公於臨邑相持慟哭共誓效死守京城破縊死驛舍王公省字子職吉水人爲遊兵所執從容引譬詞義慷慨衆義而舍之歸坐明

倫堂伐鼓集諸生曰此堂名明倫今日君臣之義何在大  
哭諸生亦哭以頭觸柱死子禎判夔州亦抗節死女靜聞  
燕兵至濟陽泣曰吾父必不生矣三遣人訪竟得遺骸歸  
甯高公賢甯被執燕王曰此作論秀才耶好人欲官之賢  
甯不肯受其友紀綱勸就職賢甯曰君是學校棄才舍而  
事新至固當吾食餼有年義則不可綱言於燕王全其志  
而遣之後卒年九十有七棄才謂黜生也

外史氏曰嗚呼燕藩之變與吳濶同而燕獨成事者以諸  
將非其敵也耿炳文以三十萬眾敗於真定李景隆以五

前明忠義別傳

卷一

十四

十萬眾敗於北平盛庸以六十萬眾敗於白溝河其他諸  
將非敗卽降降者無問矣而敗者又不卽誅益以長閫外  
之玩故曰用兵在於選將選將在於定謀爾時大勢旣已  
虛潰獨公一人竭智盡能且戰且守夫曷有濟宋叅軍說  
公收合潰將直抵北平搗其巢穴燕回顧家室南兵躡之  
令燕腹背受敵大難可平公以南將鴛材無足恃不聽人  
頗憾之不知燕王之才非宸濠比宸濠鴛馬戀棧故新建  
得成其功燕王傾國而來計不返顧劉季不惜烹父奸雄  
狠鷲夫何所難卽破北平益以南下於國事總無當耳夫

濟南之役燕王幾已成擒而卒脫去白溝夾河藁城諸戰  
燕又皆得風助嗚呼三代以還皇天於亂臣賊子往往曲  
爲保護而贊成之亦何怪獎逆之徒紛紛接迹於世也乎  
忠節錄曰李文達天順日錄記鐵鼎石死義甚烈二公  
皆鄧人也故能知之王文恪紀聞謂公死後二女入教  
坊數月終不受辱有鐵同官至二女爲記首章所謂今  
日相逢曰司馬尊前重與訴琵琶不知同官何人乃敢  
以此語聞上乎第二章所謂春來雨露深如海嫁得劉  
郎勝阮郎亦似已嫁後詩也立齋問錄云公於三十五

前明忠義別傳

卷六

五

年十月十七日過害子福安發河池千戶所充軍父仲  
年八十三與母薛安置河南一女四歲發教坊似與文  
恪少異二詩或出好事之口然當時以鼎石非內朝臣  
雖數窘上且不屈而尙未至族誅朱國楨曰死節諸臣  
一經發配如投黑井或沉或爲蝦蟹所弄同歸於盡皆  
當暗垂淚付之瞑瞶好事者捏出鐵女二詩讀之嘔穢  
欲吐女不幸而收又重不幸遭此枉誰爲明之者前錄  
所辨最妙其餘教坊諸語皆削去鄰於擴清有功建文  
諸臣多矣予按鐵女所爲詩錢謙益列朝詩選亦爲辨

雪朱彝尊明詩綜謂吳中范昌朝題老妓卷詩載皇明  
珠玉王文恪非無識者獨紀而傳之何耶

前明忠義別傳

卷

六

齊尚書黃太常合傳

尚書諱泰深水人洪武二十年應天解元明年進士歷官兵部尚書太常諱子澄初名湜以字行分宜人洪武十七年鄉試第二明年禮部第一歷官太常寺卿初高帝封建藩王地大勢重亞於天子而燕近邊得專制賜以甲兵衛士尤盛羣不逞之徒歸之訓導葉君昇疏言分封踰制禍患立生帝怒遽問死由是諸王益無忌會高帝崩遺詔諸王臨邸中無奔喪燕王不從強入臨至淮上尚書請急出敕勒歸國當此之時燕王憤甚已耿耿有取代意矣明年

前明忠義別傳

卷一

七

復假入覲直馳皇道登陸不拜氣剛勢逼朝廷患之先是高帝時諸王率悍悖蒙譴謫恭閔爲太孫曰太常爲東宮伴讀坐東角門謂太常曰諸王尊屬擁重兵奈何對曰諸王僅有護兵足自守萬一有變以六師臨之誰其能支漢七國非不盛卒底亡滅大小強弱之勢不同順逆之理異也及卽位有告周王橚與燕湘代岷四王通謀不軌者帝召太常謂曰先生無忘東角門之言遂出與尚書議削諸王兵權尚書謂燕握重兵素有大志當先圖之太常曰不然燕預備已久宜先取周剪燕之手足而燕乃可圖於是

遣李景隆襲執周王而遷之雲南燕王上言請宥帝惻然欲中止二公爭之未決趨出相語曰縣官婦人之仁今事勢如此安可不斷明日入言曰周王已獲可慮者獨有一燕擒燕則大事定矣燕王出塞有功德名日盛及今不去後悔何追當是時燕王僞稱病而謀逆益急告變者亦踵至太常曰成大事者不顧小信因其久病正天與之時先人者制人此之謂也則以備邊爲名出兵開平諸鎮而更置北兵守臣燕王遂舉兵反以索姦臣周公輔成王爲言耿炳文者老將也子尚王最親李景隆者文正子亦門

第肺腑當此之時拜炳文平燕大將軍領諸將進征連敗以景隆代之則又敗廷臣請正罪不聽太常撫膺慟哭曰大事去矣誤薦景隆萬死不足贖罪燕兵至淮上帝不得已遂二公密使募兵而以竄齊黃告燕求解兵燕王曰此緩我也不聽益進兵金川不守遂入篡尙書至廣德欲往他郡起兵興復所乘馬慮爲人識墨塗之行遠汗流墨脫有見者曰此齊尙書馬也遂被執送京師不屈死之誅九族太常至蘇州與知府姚公善倡義勤王亦被執見燕王曰臣知殿下以兵力取富貴不知殿下卽此位若欲用臣

是不欲以綱常治天下乎燕王解頤曰聞卿博學善讀書  
不比方孝孺執迷朕將悉赦若罪曰經史柔翰治世所用  
亂世將安用耶况富貴瞬息何足重輕殿下向來悖謬不  
可爲訓恐子孫有效尤而起無足怪者燕王變色曰此天  
命有在聞汝欲借兵日本勝我果有之乎曰皇祖起義兵  
定天下生殿下男力冠世托東北大藩永衛王室北敵胡  
塵不能往靖而反內噬若臣引夷內攻與殿下逆謀何異  
燕王曰此細人言不足信朕亦不以此罪汝今以魏徵趙  
普不足學則迂甚矣令引江西所錄族人六十五人妻族

前明忠義別傳

卷一

九

外親三百八十人至皆斬之燕王曰知汝必不爲我用富  
認何罪責書於紙曰湜本爲先帝文臣不職諫削藩權不  
早以成此克殘後嗣甚不足法王命截其手曰汝雖不入  
島夷足跡已至海上復命截其足磔死年五十三尙書一  
子甫六歲給配赦還嘉靖中鄭尙書曉至溧水見其五世  
孫光裕卽六歲兒後也太常至蘇州姚公造黃冊編籍其  
長子珪爲道士更名玄微守譜籍次子玉爲里正更名彥  
修守室家皆作崑山人太常臨難後彥修掾吳音充解役  
收骸骨江行夜藏焦山一愛妾在繫所爲紙牌祀之忽晝

雷大風發瓦攫取其主去後裔孫黃熊與蔣乾同以上塚  
爭地致訟還山登祭忽地中聲如雷青氣上冲裂一潭御  
史劉璉驗實上聞表墓立祠吾學編云一子走易姓名爲  
田經遇赦家湖廣咸甯後復姓有黃表者字汝明中正德  
辛巳進士燕王旣篡立之四年有以齊王搏之變告者召  
其諸子竝削爵爲庶人安置廬州已而谷王穗漢王高煦  
俱謀逆則又削爵安置謂侍臣曰卿等謀國勿以黃子澄  
臨刑爲諱

外史氏曰嗚呼削藩之舉揅之太蹶而遣將用兵復多乖

前明忠義別傳

卷一

三

舛事後責備二公固有不得辭其咎者然燕王狼鷲沉猜  
謂可以德感說動姑少寬假宜無禍患者卽燕王且氣或  
存亦未能决然自信不肯叛也何者虎且翼角勢不得已  
也論者謂太甲顛覆湯之典刑伊尹放之桐天下不稱逆  
文皇卽舉兵南下豈過愷非其倫設辭助攻此固與於逆  
亂之尤者也彼其馳道登陸自擅不臣獨非顛覆太祖之  
典刑顧可恕而釋之而罪專責上乎卽云大杖則逃未聞  
大杖則反戈也由是說也蒯瞶之殺小君爲諍子而輒之  
稱兵爲幹蠱乎又謂當燕兵薄城有如建文天子誠將東



且毋用兵拒出九卿中官數百人城外雍雍然執幢御蓋以親王禮奉迎曰聞殿下欲法周公輔成王成王敬速以入而天子身自衮冕臨朝設周公所負屐以待此則所謂揖讓救火放虎自衛彼燕王者果低首下心反風滅火曲盡臣節而事孺子王乎嗟乎委弱肉於餓虎之側而幾幸其不食必不可得之數雖鴛材昏童亦斷斷不出此矣且夫賊亂之人固未有顧名義者也既爲楊廣何所不至而且謂是時文皇勢不得引嫌自退必且假手必且推双以居天下之不韙夫以帝王之尊社稷之重而爲嘗試一擲前明忠義別傳

卷一

三

以賂換亂臣賊子之惡名其得失孰多乎意蓋欲歸罪二公故不覺言之誕也斷斯案者其唯朱國禎之論爲平允乎朱國禎曰北平兵起專以齊黃爲主名坐曰亂政曰奸黨且遵祖訓訓兵待命夫復何辭然請以建文時勢籌之上承高皇之重下值親藩之強主父偃之策迂緩何及於事火在眉尖非優容卽削奪不過兩端抑事有未易言者周王悍悖此皆孝慈親孫子也當高皇時已恬不知畏何有於建文乃高皇可以父道訓建文不得以君道臨何者高皇先天而天不違者也患在外不在內草昧之基骨

肉間義不勝恩建文後天而天不可奉者也患在內不在  
外極重之勢堂陛間恩不掩義而文皇以天挺之英名則  
叔父強則幽燕威名既重翼羽暗成直馳皇道其何能堪  
重以告變紛紛南之圖北北之抗南勢所必至而勝敗存  
亡之機已豫定於冥冥之中矣二公受建文知遇泰既親  
承顧命黃亦先有成言畫策自當如此若一主優容人心  
難厭究且陵夷終於亡國此在暗劣如漢之桓靈甘心受  
制謂仁明之主強力不二心之臣肯泯泯爲天下萬世笑  
乎君可逃逃之不可死之臣則盡心焉盡命焉又盡族焉

前明忠義別傳

卷一

五

道如是止矣若輕著口角有誤國失策罪魁之語此又與  
於陳瑛之甚者也文皇亦且震怒矣

卷一

祭

前明忠義別傳卷二

胡大理傳

公諱閏字松友鄱陽人舉秀才授都督府都事進經歷建文中官右補闕燕兵起與齊黃輩日夜密謀防禦東昌捷至陞大理少卿燕王旣篡立召方公草詔繼召公及高公翔皆衰絰至哭聲徹殿陸王召公先入令更服公曰死卽死服不可更王曰九族俱應死面傳抄提恐之公大罵不屈命力士以金瓜擊其齒齒盡聲不絕王怒縊之死以石灰水浸脫其皮草實之懸武功坊籍其家子傳慶與其族

前明忠義別傳

卷二

二百十七人皆縛至市斬哭聲震天兩列御史咸掩淚陳瑛者逆黨也性殘忍王屠戮諸公瑛之力爲多至是亦色慘次子傳福年六歲充錦衣衛軍一女入功臣家曰郡奴親友坐累死者數千人傳福十一歲卽出幼成交趾六十一年一鰥而死郡奴方四歲母任就縛時自懷中墮地一卒提入功臣家昏睡夢與父母相持泣覺則抱一猫臥也稍長髮至寸卽自截去日以爨墨汚面秃垢不作人狀功臣家亦不以人類畜之後以赦乞丐歸誓不有家年五十六而終尚處子也鄉人謚曰忠亂貞姑公家故址左右荒榛時

見光怪久之有一猿獨哀鳴徹曉稍夜人不敢行萬歷初  
御史屠叔方疏請盡釋戍籍人得允文移長丈許榜邑門  
忽旋風捲入天際日正中若素鸞翔廻自午迄申復還邑  
正堂中人皆異之

外史氏曰嗚呼公少與同志友講業長沙王吳芮祠中以  
忠義相砥礪畫一松於壁題曰蒼虬出壑系以詩太祖過  
而見之喜甚問得其名及舉秀才入見帝曰此題詩鄙陽  
壁者耶因令通籍其不遺一善如此至於燕王則不然其  
於忠臣義士必根株盡絕乃已奉天刑賞錄謂公夫人旣  
前明忠義別傳

卷二

二

死有把與狗喫之旨婦女何辜又何其積怨深怒若斯之  
極也

黃侍中傳

公諱觀字瀾伯一字尚賓貴池人榜姓許洪武甲子貢入太學領解登上第胡季安爲祭酒太祖以監生許觀鄉試會試殿試皆第一特詔褒獎之是爲國初三元也除修撰擢禮部侍郎改侍中與方齊並見信用建文四年燕兵已迫奉詔募兵上游督諸郡勒王至李陽河聞變痛哭朝服東向再拜投羅刹磯湍流中死之時年三十九先是公度國勢不支知夫人翁有志節必不辱招魂葬之江上而夫人果被執發配象奴佯持金釵給象奴出市酒肴急攜二前明忠義別傳

卷二

三

女率家屬十人沉淮清橋下死

一日襄  
虹橋

燕玉得公冠東芻

肖形斬之族其家逮及姻黨公屍順江流而下夫人屍溯江流而上數百里會聚焉方夫人投水時嘔血石上成小影每陰雨輒見彷彿鬢髮側立清溪居民時見冠裳者一人攜二二女郎立溪畔人爲公也駭歎立祠而以夫人配

食

外史氏曰嗚呼自古篡弒之殘虐未有甚於燕王棣者也夫革除之際忠臣義士式閭封墓固無望於季世然如王保保之逆命蔡子英之思主保全禮遣高帝之仁風義概

固足以教忠孝而動頑殘且此猶異姓之臣亡國之俘不  
得與宗國世臣比燕王去高帝無幾時也失豈不聞焉胡  
乃篡國之後舉君父教養愛惜之人材族烹瓜蔓酷辱妻  
孥甚復逞淫刑於既死之遊魂殘魄不已慎乎劉誠意語  
高帝有云殺運未除然未聞乾坤殺運專爲忠臣義士而  
開也豈三代以後之天弑父弑君陷於氣數之中卽殺士  
殺賢不得不出於情理之外乎迨至榆木川之變死非正  
終屍徒錫錮此與沙邱輜輶亦復何異况夫高煦效尤銅  
缸骨燼語云君以此始亦以此終可不懼哉可不戒哉

前明忠義別傳

卷二

四

練御史傳

公諱子甯初名安以字行其先本江西淦東東山人父信遷三州是生公三洲南爲王峽峽後爲縣公實縣人也洪武十八年會舉對策以第一甲第一人授翰林院修撰陞副都御中工部侍郎建文初爲吏部左侍郎拜御史大夫燕藩變起李景隆用兵屢敗召還公執景隆於朝數其罪請誅之景隆文正子驕汰妄人觀望懷二心帝以門第肺腑故不聽公憤激大呼曰壞陛下事者必此賊也臣備員執法不能鋤奸請先伏誅因大哭求死帝駭而罷朝先是

前明忠義別傳

卷二

五

耿炳文敗帝問誰可將者太常卿黃子澄力薦景隆舉朝爭言其不可帝徇然之親讌之於江滸賜犀玉帶斧鉞而召炳文還京亦不誅燕兵渡淮靖玉府長史蕭用道魯府紀善周公是修上書指斥用事者誤國齊黃怒且詭公曰事已至此尙不能容言者乎齊黃愧而止燕王篡立指揮劉傑縛公至語不遜斷其舌曰吾欲法周公輔成王耳公噴血直前曰成王安在遂族其家姻賊逮死者百五十一人戍邊者亦數百人公死時有侍媵抱匝歲子匿民間得免展轉入閩傭保六世孫綺爲新甯陳舉掌書記萬歷戊

成陳計偕入浙有江右生楊應祥同舟先一夕夢公持刺  
來謁心異之比入舟見書記侍側雅暫不羣指問何姓綺  
以本姓對生心動卽曰得非吾里練中丞後乎綺不應而  
泣數行下生疑駭固叩之初公被擒前一夕取血裙大書  
練字付侍賚者世閱之不示人綺緘於衣領中至是言其  
詳發之有光燧然上冲者久之生亟以百金贖綺陳不受  
遣綺綺不肯行曰以死殉國人臣之恒且九族赤矣歸將  
何爲生益賢之歸家具白當事者以幣來聘授以巾服置  
田盧百畝俾奉公祀一時聞者嘆息謂天道非遂無知者

前明忠義別傳

卷二

六

競爲歌詩紀其事公故峽人嘉靖元年以流賊亂割分峽  
江爲縣而淦東東山寶隸峽淦與峽爭立公祠淦之人曰  
公淦人也何與於峽峽人亦復之至爲訟詬詈太守錢琦  
議兩祀乃定琦爲立碑系以詩曰中原龍戰日萬國撼雷  
風天意別有主人心獨在公青山無斷骨白日顯孤忠到  
此看臣節羞言靖難功

外史氏曰嗚呼以奸雄之姿而挾以帝王之力夫何所不  
至哉然而不能奪匹夫匹婦好善惡惡之心公歿百餘年  
淦峽之人爭祀不衰卽當日之腹誹日怒於淫刑以逞者



舉從可知矣莆中有二蔡一君謨派一京派京子孫慚京  
所爲與人言每自詭爲君謨後蓋祖宗之奸邪不齒於子  
孫若此方黃諸公燕王所目爲奸黨者逮夫榆川告變屍  
且未寒仁宗卽諭侍臣方孝孺輩皆忠臣宜從寬典雖有  
孝慈不改幽厲可畏也夫

前明忠義別傳

卷二

七



卷二

忠義別傳

卷二

忠義別傳

卷二

卓忠貞傳

公諱敬字惟恭瑞安人洪武二十一年進士除戶科給事中陞宗人府經歷進戶部侍郎公負高世才讀書十行俱下終身不忘立朝慷慨英偉美丰姿善談論凡天文地理律歷兵刑皆能究悉爲給事好直言或以大剛則折爲戒曰吾知盡諫職耳禍福非所計也時諸王在宮中服飾與太子無辨公乘間言於上曰朝廷視效全在宮中此紀綱所先今陛下於諸王不早辨等威而使服飾與太子埒嫡庶相亂尊卑無序何以令天下上曰爾言是朕慮不及此

前明忠義別傳

卷一

八

建文初燕王來朝公密奏曰燕王智慮絕人北平強幹之地金元所由興也宜徙燕南昌以絕禍本夫萌而未動者幾也量時而爲者勢也勢非至勁莫能斷幾非至明莫能察帝曰燕王骨肉至親何能至此曰楊廣隋文非父子耶帝默然燕王旣入篡責公不奉迎曰此非前日奏裁諸王者耶公厲聲曰若用敬言王安得至此燕王欲殺之而憐其才且曰奸臣皆欲害朕敬止欲徙朕內地耳繫獄或以管仲魏徵事勸公不聽姚廣孝爲僧有重名公每輕而抑之銜甚曰昔吳王不殺范蠡而蠡卒沼吳王衍不殺石勒

而勒終殺衍陛下所藉爲重全在地勢敬言見用一至江  
南直囊中物耳豈有今日哉遂族誅之公臨刑嘆曰變起  
宗親略無經畫敬死有餘罪神色凜然經曰如生後學士  
劉忠愍公傳其事私謚曰忠貞

外史氏曰嗚呼恭閔之朝君臣交舛人謀不臧天亦職其  
咎矣蓋叅軍斷事高公魏謂帝曰各處親王驕逸不法皇  
上所難處也臣愚賢如河間東平則下詔褒賞之驕逸不  
法如淮南濟北初犯則容之再犯則赦之三犯而不改然  
後合親王告太廟削其地而廢之豈有不順服者哉監察  
前明忠義別傳 卷二 九

御史韓公郁曰釋代王之囚封湘王之墓還周王於京師  
迎楚王爲周公俾各命世子持書勸燕罷兵守藩不聽善  
夫公之言曰幾非至明莫能察勢非至勁莫能斷當是時  
大臣謀國意忮才疎識暗智短廟堂多臆錯之謀闖外鮮  
亞夫之將烽火迫於京畿柔翰弄於便殿秘計欲剪親王  
廣誓無殺叔父乾坤鼎沸首鼠兩端然薪寢火借劍無人  
國勢至此欲無亡得乎李贄謂齊黃諸人功之首罪之魁  
罪魁滅建文功首興成祖夫事後而論罪或然矣功何有  
哉從而爲之辭卽齊黃亦屍視也

公諱清本姓耿真甯人洪武二十七年試禮部第三人廷對第二人授編修歷官右僉都御史燕王謀不軌公奉命察燕邸動靜燕王讎之言論明快大被稱賞旣篡立諸臣死節者纍纍公審恭閔帝出亡圖興復獨自詣燕王燕王喜曰吾故人也卽仍其官當此之時燕王目齊黃諸公爲奸黨榜姓名於朝堂而赤其族公倜儻尙大節人不敢犯以私有妖憑一女畏公輒避之天下無少長稱正人卽交口曰景秀才公素與齊黃諸公善又數預兵謀誓慷慨殉

前明忠義別傳

卷二

十

國難至是獨委蛇侍班人頗怪之公之侍燕王也雖曲柔待變而義不能無形於色燕王亦不能無疑於公會欽天監奏有星犯帝座甚急其色赤一日早朝公獨着緋燕王心動執而褫其服則衰衰麻帶劍躍起奮立嫚罵曰欲爲故主報仇耳燕王大怒曰且無論天子卽親王敢爾公曰若背畔高皇帝命爲亂臣賊子卽已非親王何乃天子大罵不絕聲抉其齒且抉且罵頃之含血若有所啟衝而前直噴燕王衣燕王驚起而走面如土羣臣侍殿上者咸愕貽失措遂剝其皮草植之械長安門鐵帚刷肉至盡碎磔



公諱希賢恭閔帝從亡臣也松陽人由賢良官御史燕兵  
犯闕帝倉皇欲自殺翰林程公濟曰不如出亡眾諱言皇  
祖有遺篋搜大難則發今藏奉先殿宜急出之少頃少監  
王鉞捧篋至發得度牒三紙曰應文應能應賢釋帽緇衣  
鞋刀備具程公卽爲帝祝髮教授楊應能受應能牒公毅  
然曰臣名賢應賢無疑亦祝髮程公袖出黃冠自易遂從  
帝遁去永樂紀年之癸未公從帝投滇之永嘉寺甲申從  
帝去滇至襄陽就牛景先於西山秋由池上抵廣州過史  
前明忠義別傳 卷一 三

仲彬家復從帝至杭覽湖山諸勝匿迹淨慈寺從帝渡錢  
塘浦江鄭洽家帝坐孝義堂堂中扁無故墮地趙天泰曰  
此不可久留從帝去而至會稽雲門寺重九從帝游天台  
雁蕩冬從帝還楚蜀乙酉從帝至重慶雪菴和尚結菴於  
善慶里遂奉帝畱居焉丙戌從帝至滇依西平侯沐晟投  
五華山登梵宮獅子座繼聞甌甯王永熯暴卒晟恐亟請  
帝逸公與應能結庵於永昌白龍山請帝居之己丑帝東  
行畱公與應能守庵未之從也庚寅帝還白龍山辛卯有  
司燬庵從帝去白龍山至大理之浪穹公與應能募建菴

菴成程公筮之得剝之坤曰剝極而順吉卦也居之壬辰  
四月公卒先是是年三月應能亦卒帝慟連喪兩亡臣哭  
而並葬菴東方恭閔之祝髮而遁也共至神樂觀議從亡  
者二十有二人兵部侍郎廖平襄陽人刑部侍郎金焦貴  
池人翰林侍讀史仲彬一曰史彬吳江人編修趙天泰三  
原人程濟朝邑人一曰績溪人待詔鄭洽浦江人浙江按  
察使王良祥符人一云黃直武進人四川叅政蔡運南康  
人刑部郎中梁田玉中書舍人梁良玉梁仲節俱定海人  
宋和臨川人郭節連州人刑部司務馮灌黃巖人鎮撫牛  
前明忠義別傳 卷二  
景先沅人王資劉伸教授楊應能俱杞縣人欽天監正王  
之臣襄陽人太監周恕何洲吳江人竝公爲二十二入約  
定左右不離者三人比丘楊應能道人程濟並公應賢爲  
三也往來給運衣食者六人馮灌時稱寒馬先生時稱馮  
翁時稱馬公時稱馬二子郭節時稱雪菴後稱雪和尚宋  
和時稱雲門僧時稱稽山主人時稱槎主趙天泰適衣葛  
襦衣葛翁時稱天肖子王之臣家世補鍋號者補鍋牛景  
先稱東湖樵時稱東湖主人餘俱遙相應援以濟緩急  
外史氏曰嗚呼燕王旣篡之後肆其虎狼殘殺之心密網

深求忠臣義士幸而獲保要領族姓者蓋亦絕鮮矣其晦迹者率多漫滅不可考好事者或搜訪哀錄大都傳聞異辭然義關名教君子甯過而存之且此諸人皆從亡之最著者也予故附載之俾世之學者知方卓諸公之外尚有危身奉君刀鋸鼎鑊所不惜而卒亦莫能及者夫亦笑宓網深求之徒爾爲已而入山蹈海堅忍幽墨於盲風怪雨之中怨彼蒼而嫉時日瘋憂抑鬱以死欲求其行事而不可得者當復何限也哉

前明忠義別傳

卷二

古



公諱濟陝西朝邑人一日績溪人以明經爲四川岳池教諭高皇崩恭閱帝初卽位未踰年也公上書言北方兵起期在明年請豫爲備先是洪武十五年詔選高僧入侍諸王僧道衍以術干燕王謂當爲天子燕王卽乞道衍得之旣之藩日操車馬與道衍袁珙異人術士之流謀不軌伺中朝甚慧反有日矣而帝謂燕王骨肉至親非所宜言朝議公謬妄逮至京將殺之公曰陛下幸囚臣至期無兵殺臣未晚遂下獄明年燕王反赦公爲翰林編修燕兵至淮

前明忠義別傳

卷二

五

上廷臣有請出幸湖湘或浙江以避者方公孺謂當堅壁以待勤王之師議不決公曰守亦亡不守亦亡然守爲是乃定四年六月乙丑燕王犯闕吏部侍郎蹇義戶部侍郎夏原吉等暨編修楊榮楊溥吳府審理副楊士奇世所謂三楊待詔解縉所謂解學士者也率先羣臣迎燕王叩頭勸進當此之時帝左右惟數人遂盡閉諸后妃宮內縱火焚之挈三子變服出走倉皇復棄三子於宮門長吁欲自殺公急入宮衛帝請曰數也不如出亡臣當從當此之時少監王鉞進高帝所遺鐵篋公碎篋得度牒袈裟帽鞋

剃刀俱備卽爲帝祝髮從鬼門出帝遂爲僧號大師教授  
楊應能御史葉希賢亦祝髮從公袖出黃冠自易造物之  
幻也高帝以皇覺寺僧傾側擾攘削平僭亂爲中原天子  
帝則天潢亂子元孫奉神靈之統爲宗廟社稷臣民之主  
亡而爲大師道衍妙知菴病虎嗜殺之徒濟惡燕王釀成  
篡奪爵列五等公與楊公葉公文學侍從之臣爲黃冠爲  
緇衣竄名易姓於掾瓢持鉢南北東西虎狼窺伺之鄉舉  
一代之祖孫父子君臣朋友得喪窮通反覆錯亂於浮屠  
氏之間抑何怪也論者謂高帝於諸王不慎擇名儒碩德  
前明忠義別傳

卷二

六

夢夢於奇衰之僧詒謀之不臧此責備之剝談不足又道  
者也公旣奉帝出亡自神樂觀啟行由京口過六合至襄  
陽抵雲南永嘉寺畱一年明年奉帝離雲南由重慶抵襄  
陽入吳至史彬家史彬者徐王府賓輔與刑部侍郎金焦  
等晦迹遙爲帝應援者也事在葉公希賢傳畱彬三日奉  
帝游兩浙歷天台雁蕩與金焦馬二子稽山主人會已而  
復奉帝返雲南明年奉帝至重慶之大竹善慶里明年奉  
帝至西成侯沐晟家畱旬日結茅白龍山明年戶科都給  
事胡濬訪張三丰實爲帝公奉帝遁迹不出明年白龍菴

災公出山募草明年奉帝東行至善慶里復里襄陽已而  
還蜀明年奉帝復至白龍菴史彬郭節程亨至各獻帝方  
物明年有司毀菴奉帝至浪穹鶴慶山募建大喜庵明年  
楊葉二公相繼卒公獨侍帝左右明年奉帝南行至旬度  
馬嶺遇寇幾殆卒以帝免明年爲帝募糧侍帝學易數明  
年奉帝游衡山明年承帝命錄述從亡傳藏山巖中帝足  
疾發公乞藥於城西帝初亡時脛卽痛不能行公扶持痛  
良已帝嘗歎濟險阻相依周旋不二也公亦嘗病帝日夜  
坐榻旁淚雨下公泣曰濟不死師在濟何敢死其以天命

前明忠義別傳

卷二

七

自信如此明年與帝遇史彬於鶴慶之大喜菴奉帝避囂  
東行復至衡山明年奉帝還黔明年侍帝觀佛書明年奉  
帝入蜀徧游諸勝登峨眉明年奉帝入粵游南海諸勝明  
年奉帝避囂於菴南之淥泉明年奉帝入楚登章臺山畱  
大別山明年奉帝東行遇史彬於逆旅復奉帝遊天台至  
甯波渡蓮花洋是年燕王棣稱皇帝之二十二年甲辰秋  
七月庚寅殂於榆木川明年奉帝謁大士於潮音洞己而  
自閩粵還山是年仁宗崩明年侍帝祭從亡諸臣於菴前  
明年奉帝移居鶴慶之靜室是年高煦反宣宗擒錮之已

而鎔死明年滇寇亂奉帝入蜀明年奉帝游神女廟黃子  
磯漢中明年奉帝至成都明年奉帝還浪穹菴燬移鶴慶  
山明年爲帝出募菴成帝顏之曰潛志明年奉帝往陝西  
至延安南行入蜀至夔明年奉帝入楚至公安武昌下九  
江復遊杭州吳山天台明年奉帝在赤城明年奉帝復至  
吳江史彬家彬已死復游會稽明年奉帝往粵西是年宣  
宗崩明年奉帝還滇卜築舊日之浪穹明年奉帝復游峨  
眉已而還浪穹明年奉帝復遊粵西明年勸帝還滇不聽  
明年帝決意東行公著之得兌之歸妹拊几大呼曰大凶  
前明忠義別傳

卷一

七

今太歲干支皆金火必克之行夏之時其危乎會有同寓  
僧竊帝所爲詩事覺公從帝至京帝迎入大內公北向稽  
首日今日方終臣職矣遂去不知所終初公與同邑御史  
高公翔言志高曰願爲忠臣公曰願爲智士燕王旣篡召  
問高公高喪服入見語不遜夷其族發其先墓雜犬馬骨  
焚灰揚之以其地爲漏澤園親戚悉戍邊諸給高氏產者  
皆加稅曰令世世罵翔也

外史氏曰嗚呼建文永樂之際君臣之變極矣論者咎齊  
黃首禍予燕兵端予獨以爲不然燕王之於恭閔固所謂

削亦反不削亦反者特矯誣其名不欲顯冒不韙耳高煦反宣宗時傳檄遠近亦以首輔蹇義夏原吉爲辭苟煦事成蹇夏一齊黃矣史臣怵禍傳會後世執辭歸獄豈不愚哉且燕王於恭閔諸臣不留遺種慘於割斬不留隻字烈於焚坑獨於恭閔史氏紀有容忍焉有恕辭焉無是理也况其子孫之朝歷數十年時移勢易羣臣請修建文寶錄復還紀年固靳不許卽當日可知矣自古篡弒之人暗奸神器不甚其君之罪不足以厲人心不滅其君之迹不足以欺後世不謂骨肉至親而亦然也悲夫昔者有窮篡夏

前明忠義別傳

卷二

九

少康奔竄四十年其故臣伯靡卒能收燼殄堯光復舊物公從恭閔出亡亦四十年往來東南滇黔諸省顧不能糾集義旅爲恢復之舉豈其才略出伯靡下哉天數已定公知之稔誠不欲以其君爲孤注之試也蓋恭閔之瀕於危者數矣賴公得脫天之生公固特別開一君臣之局於鞠躬盡瘁成敗利鈍之外不可以常理測也卒之恭閔不復國而歸國不作君而作師考終大內掩魄西山而燕王父子之骨固已朽久矣知哉惟公仁哉惟公

入手將詔選高僧鐵案特地提清推原禍本非爲齊黃

出脫也通篇紀事只以明年二字渾舉不用永樂紀年  
卽諸帝之崩亦概從附見是時恭閱遼荒國統雖絕然  
其身固在也諸帝止書崩不書卽位至永樂則直書殂  
且書名書地書稱皇帝義頗竊取○燕王舉兵宜書反  
不宜書靖難恭閱焚亡宜書篡不宜書遜國域中事無  
大於此者那得摸稜○他本載公習奇門遁甲諸異術  
余槩爲削去纔覺正當

自記

正統五年有僧年九十餘自雲南至廣西給人曰我建  
文也張天師言我有四十年苦今爲僧期滿宜亟返邦

前明忠義別傳

卷二

三

國以黃紙爲書命其徒清進持詣思恩府土官知府岑  
瑛瑛執送總兵官柳溥械至京令官鞠之乃言其姓名  
爲楊行祥河南鈞州白沙里人洪武十七年度爲僧歷  
游兩京雲南貴州至廣西英宗命錦衣補錮禁之凡四  
踰月死獄中其同謀僧十三人俱謫戍遼東邊衛事見  
皇明典故紀聞

卷二

祭

前明忠義別傳卷三

劉忠愍傳

公諱球字求樂安福人永樂十九年進士授禮部儀制司主事薦侍經筵修宣宗實錄成改翰林侍講正統八年夏雷震奉天殿詔求直言是時內監王振專侍帝起居多不法帝狎之益爲亂公應詔陳十事勤正學以正心德親正務以總乾綱別賢否以清正士選禮臣以隆祀典嚴考覈以隆吏治慎刑罰以彰憲典罷營作以蘇民勞定法守以杜下移息兵威以重民命修武備以防外患疏入振大怒

前明忠義別傳

卷三

一

而錦衣指揮彭德清者公鄉人也附振用事公卿率趨謁公獨不爲禮德清脚之摘疏中乾綱使不下移語激振曰此指公也會編修董璘自陳願爲太常卿事神下詔獄而公疏有太常不可用道士宜易儒臣語則太喜曰此可並殺球遂矯旨逮公當陞掙去縛至暗室中密令錦衣指揮馬順殺公一夕五更順獨攜一校推獄門入小校前持公公知不免大呼曰死訴太祖太宗校持刀斷公頸血流被體屹立不動順舉足倒之曰如此無禮遂支解之裹以蒲埋衛後隙地董璘時在獄與公同臥從旁匿公血裙璘尋

得釋持以歸其家始知公死然未審何日也子鈺鉞求屍  
僅得一臂乃以血裙葬焉後贈翰林學士諡忠愍害公小  
校後語人曰馬順使我懷刃相隨迫於勢不得不爾比聞  
劉公忠吾儕小人死有餘罪矣因慟哭死未幾馬順子亦  
死死時掉順髮拳且蹴之曰老賊令爾異日禍踰我我劉  
球也英宗北狩眾擊殺順蹴踏搶裂頃刻而盡并請景帝  
籍振家無少長皆斬之先是麓川思任發叛擾邊王振方  
倖用事欲示威四夷力請大發兵討之公上言帝王禦夷  
狄不窮兵於小敵以傷生靈惟防患於大寇以安中國今  
北虜脫歡也先父子並吞諸郡深謀入寇而思任發依阻  
山谷悔過乞降議者乃釋豺狼攻野豕舍門庭之近圖邊  
徼之遠非計之得也臣愚以爲麓川僻陋滅之不爲武釋  
之不爲怯至於西北諸邊宜謹烽埃修墩堡選將帥練士  
卒豐糧餉備器械庶爲有備無患振不從未幾已巳之變  
車駕蒙塵而公言乃大驗公旣死布衣成器設位龍泉山  
巔爲詩文祭而哭之人名爲祭忠臺

死史氏曰嗚呼有明宦官之禍始於王振而釀於三楊祖  
制內官不過五品傳奉灑掃而已其名無聞也永樂中馬



雲孟麒麟人聞其名矣然猶未甚用事也宣德王瑾劉永成諸人承寵用事矣然猶未專政柄制國令也至正統時王振竊弄太阿生殺在手而國勢遂大變矣自此而天子深居大內不得與群臣相接議政矣自此而公孤尸素拱承瑞命票擬不得與聞矣自此而天子呼宦官爲先生舉朝尊宦官爲翁丈上無紀綱下無廉恥首足倒亂武備懈弛而胡虜跳梁至尊蒙塵矣梁芳李廣汪直錢甯劉瑾之徒相繼接踵以天子爲傀儡等卿貳若嬰兒馴至魏闔而明社屋矣嗚呼禍所從來誰職其咎哉方英宗卽位之初

前明忠義別傳

卷三

三

纔九齡耳王振不法積非一日三楊受顧命輔幼主防微杜漸清君側奸事無有重於此者帝旣冲幼倣韓魏公竄任守忠故事必無中阻旁撓之患勢無有易於此者又况太皇太后旣知振奸欲賜振死乘此直陳其罪而掉而戮之機更無有捷於此者胡乃曲爲乞命養此大憝當斷不斷非所謂模稜者耶遂使移碑毀祖宗之制專政掾生殺之權箝制臺諫焚炙忠良土木之變幾危社稷誰秉國鈞誰生厲階世多稱三楊相業爲有明之冠予特以爲心薰祿位志怵禍機去鄙夫一間耳雖有補苴何足數哉英宗

蒙塵陷虜南城禁錮慮患掄心應已備至復辟之後獨痛悼王振追官刻像諭葬祠祀不一而足認賊作子死且無悔惟大人爲能格君心之非有旨哉有旨哉使振尙在當必復用吾未知禍之所終極也則三楊遺之也王振問楊士奇曰吾鄉人誰可大用者士奇薦薛瑄夫以宰相薦賢婦寺辱朝廷污簪紱不已極乎卒之文清以不附振幾陷大戮伯仁由誰而死可謂知文清者乎且王振問及鄉人是樹黨也卽不宜以其鄉人對文清卽爲振鄉人賢者也亦不宜舉以爲振對無一可者也因次公傳而附論之

公諱謙字廷益錢塘人永樂十九年進士宣德初授山西道御史超兵部侍郎巡撫河南山西歷十八年還部正統十四年己巳英宗北狩郟王奉太后命監國百官集闕下憤王振挾上陷虜傾危社稷請滅族以安人心奏未竟而錦衣指揮馬順者振黨也從旁叱眾退給事王竑憤起捽順首曰此所謂翼虎者今日猶敢爾眾爭捶之立死又捶二閹之嘗私振者死當是時眾聲洶洶班行雜亂王懼欲退諸大臣皆披靡有趨匿者公直前掖王請降令旨捶順

前明忠義別傳

卷三

五

與闖死者義激無罪行族振籍順家矣眾乃退公徐步出掖門吏部尚書王直執公手嘆曰朝廷正藉公耳今日雖百王直何能爲尋進兵部尚書郟王旣卽位公泣言於上曰虜得志挾我大駕勢必長驅而南今軍實武庫兵盡矣司馬宜急分道募兵及留漕卒自益司空宜並日蒐乘繕械九門要地宜令都督孫鏗衛穎雷通張軌等分守之都御史楊善給事王竑等叅焉凡兵皆出營郭外毋令避而示弱郭外之民皆徙入內安插毋令失所而囂通州倉欲守之或不能毋委以與虜宜令官軍皆給一歲祿俸聽其

自運仍以贏米爲之直所急者草諸厰宜亦聽軍稱力取  
之不盡則焚之毋以飽虜馬冬十月也先以送上皇爲名  
與脫脫不花入寇紫荆關京師戒嚴侍讀徐瑄言天象紫  
微中宮皆有變宜及時南遷廷臣多以爲然公厲聲曰言  
遷者可斬也夫京師天下之本宗廟社稷陵寢帑藏偕在  
若一動則大勢去矣宋南渡之事可鑒也由是固守之議  
始決分遣五城兵馬司悉燒城外倉場草豆數百萬計或  
言當請於上公曰寇在目前若少緩俟命下適以資寇使  
借此持久坐困我非計也未幾也先果至焚長陵獻陵景  
前明忠義別傳

卷二

六

陵連日攻戰石亨欲歛兵避其鋒公不可曰賊氣張矣奈  
何示之弱是佐彼張也亟擐甲統大營軍德勝門外諸門  
皆嚴兵以待總二十二萬虜不敏犯以數騎來嘗公設伏  
空室使數騎誘虜虜遂以萬騎來薄伏發敗之孫鏗毛福  
壽復敗之西直門公使謀謀上皇輦駕遠夜令人以火炮  
擊其營死啗千計賊遂退庚午四月大同叅將許貴言也  
先請和下兵部議公曰今日之事理與勢皆不可和也先  
有不共戴天之仇和則背君父而違大義此理不可和也  
也先貪而多詐萬一和議旣行彼肆無厭之求從之則坐

弊違之則生變此勢不可和也若能大修武備相機戰守使彼欲不得逞上皇目必還矣因移文責貴劾介冑之臣委靡退怯法當誅於是邊將人人言戰守諸酋擁上皇大同城下勒降大同人登城謝曰賴天地宗廟之靈國有君矣至宣府宣府人亦登陴謝曰國有君矣也先果氣阻不能挾重相恫喝始歸上皇矣公抱經濟才有再造功以主事多艱經年不遷私第居止朝房畱一養子自侍先是也先屢犯京師脫脫不花寇遼東不樂出寇陝西浙江葉宗雷福建鄧茂七廣東黃蕭養各擁衆僭號南蠻西番各乘前明忠義別傳

卷三

七

間蠢動命將出師事在俄頃公內固京城外籌邊條畫悉中機宜僚吏受成相顧駭服雖宿將勳臣小不中程律卽請旨詰責片紙行萬里外無不惴惴効力上推誠倚任而口不言功深自歛飭嘗賜第關西公曰國家多難何以家爲取前後所賜璽書袍鑑冠帶弓箭之屬悉加封識歲時一謹視而已奪門事起徐有貞石亨曹吉祥輩素嫉公假公爲名坐以迎立外藩論斬籍其家方死時陰霾翳天行路嗟嘆吉祥麾下有達官指揮彘耳者以一觴酌其地而慟吉祥恚撲之明日復酌慟如故弘光初贈太傅諡忠

愍改諡忠肅賜特祠於其墓曰旌功

外史氏曰嗚呼英宗委心闈寺身繫穹廬得罪祖宗臣民萬無復君天下之理况爲強虜奇貨隨其驅遣雖青衣行酒不辱於此矣奪門之役群臣力請復辟猶當引罪退避遜位元子顧乃貪天位戮元勳詎知卽殺公於奪門之事尤無名乎景帝奉母后命監國卽眞名正言順革除帝號仇同推刃仇景帝是仇母后也且景帝當多難之秋而能任賢選將南征北距轉危爲安功在宗社固有明中興之君也使時無景帝以任公則中國六七年間不爲盜藪卽前明忠義別傳

卷二

八

爲虜窟宗廟社稷剪爲丘墟卽英宗亦何自得返乎逆闖陷身辱國事定之後尙建祠復官加恩身後兄弟功臣獨甘心焉人之無良亦至是哉或謂錮南城廢太子公造辟之言無聞焉英宗積忿於公久矣卽微有貞其能免乎

公諱燧字德成餘姚人弘治六年進士授刑部主事歷郎中正德六年超陞福建右叅政歷按察使河南右布政使陞副都御史巡撫江西時宸濠爲逆已有迹公嘆曰投艱於我死生以之顧以宗室不敢先事訟言但託禦他寇曲爲備首城進賢又城南康又城瑞州南康安義鄉者盜賊淵藪近割地開爲縣饒撫二府罷兵備公曰緩急曷倚奏復饒撫兵備不果復又請勅湖東道分巡兼理兵備與饒相爲犄角九江當湖衝最爲要害請重兵備權兼攝南康

前明忠義別傳

卷三

九

甯州武甯瑞昌及湖廣興國通城廣信橫峯青山諸窳地險人悍設通判駐其地兼督六縣又恐宸濠一旦起劫兵器假以討賊盡出衛城兵器外府憂勞數月髭髮盡白宸濠知公圖己使人賂朝中幸臣去公而遣公棗梨薑芥以示意公笑却之副使許公達謂公曰甯王敢爲暴者恃權臣也權臣左右之者貪重賄也重賄由於盜藪今惟剪盜則賄息賄息則黨孤公深然之每事輒與密議未及發而宸濠生曰公等入謁宸濠閉公等府中脇爲亂公張目直視叱宸濠曰天無二日臣安得有二君太祖法制在誰則

敢違宸濠怒遂縛公許公大呼曰孫都御史朝廷大臣汝反賊敢擅殺耶以身翼蔽公并縛之許公謂公曰我勸公先發者知有今日故也遂同遇害死之日天忽陰慘烈風驟起凡數日城中民大恐走收兩公屍屍未變黑雲蔽之蠅蚋無近者許公字汝登固始人正德三年進士許公父家居聞江西有變殺都御史及副使卽爲位易服哭人怪問故父曰副使必吾兒也世宗卽位贈公禮部尚書謚忠烈與許公葬祀南昌賜祠名旌忠許公贈禮部尚書謚忠節宸濠旣反大索兵器於城不得賊多持白挺伍文定起

前明忠義別傳

卷二

十

義兵設兩公木主於文信國祠率吏民哭之南贛巡撫王守仁討平之人於是益思公之功

外史氏曰嗚呼宸濠之變公均徭賦飭武備實倉儲散鹽利偵奸黨規防機宜纖悉備至卒之濠反索兵器無從得招寨賊莫敢發至進賢安義不能走而湖廣浙江以饒撫故不被禍凡皆公早計熟慮摧剪其機牙羽翼之力也故論功新建遜其機先比節常山同此壯烈而阻於奸倖卹典無聞則威武之過也嗚呼君如威武又何尤乎



沈光祿傳

公諱鍊字純甫號青霞會稽人少時父翁睽其室走京師誓終焉公入京悉要其鄉人爲供具長跼請歸其父翁哀號慟楚翁感動亟命駕歸翁嫗相歡如初嘉靖戊戌成進士知溧陽荏平清豐三縣入爲錦衣衛經歷錦衣帥陸炳雅重公與均禮不敢以分加公炳與嚴氏父子深相結以故公間過炳值世蕃酒世蕃虐所狎客給事者飲非其任強灌之公卽以灌世蕃曰吾代客酬也公感憤時事切齒不平則往往縱飲少飲輒醉醉則擊缶嗚嗚誦出師二表

前明忠義別傳

卷三

十一

已慷慨曼聲長嘯泣數行下左右莫不灑然變色動容知其痛恨奸諛懷忠至上也北虜薄城下廷議乞貢事群臣畏嚴氏莫敢發言公越階抗論當從趙司業貞吉拒貢却虜明日上言請得二萬騎護陵寢通餉道合勤王之旅擊其惰歸俾隻輪不返朝廷壯之已而抗疏劾相嵩父子奸邪誤國請戮之以謝天下詔杖公四十謫田保安其至保安也倉卒未有舍而保安賈者傍睨公曰非上書請誅嚴氏者耶揖之入徙家而家公知公者爭遣子弟來從學噴噴交口罵相嵩當是時虜數入塞邊臣擁兵坐視楊順

督宣大虜大破應州堡塞俟其退則割戰士及路人之耳以獻功公賦詩飛書數順罪削木爲偶人三像林甫檜及嵩旦暮射捶之已又從俠少年結死士思用間破虜虜入散金錢募土人爲城守順拮拾其狀告變嵩父子同巡按路楷捕白蓮妖黨竄公名籍中坐以通虜嵩從中下其事棄公宣府市子袞堡坐死建公長子襄於越欲並殺之順旣害公榜示邊塞有藏沈氏遺文片紙按捕抵罪諸生武崇文歛公遺稿將火之忽中惡仆地恍忽見公峨冠緋衣手劍叱之懼而瘞之後圃事白後穴地出之以授其子今

所傳鳴劍集兵書赤牘諸編是也襄居獄中以土造鼓矢之天曰此鼓若鳴則我父子之寃當白鼓成擊之不鳴卽又搏土爲之如是者數年一日鼓成果有聲嵩敗出獄伏闕上書訟父寃詔復公原官加贈光祿寺少卿襄以恩錄太學讓其幼弟袞嵩之敗也世蕃坐誅臨刑時公所教保安子弟在太學者以一帛署公姓名官爵於其上持入市觀世蕃斷頭訖大呼曰沈公可瞑目矣慟哭而去

外史氏曰嗚呼秦檜絕嗣嚴嵩亦絕嗣皇天無知而有知也豈不亦快矣哉方嵩之戮公并逮諸子而致之死與秦

檜風波之獄夫甯有異其爲子孫富貴之謀身後仇讎報復之慮連固根本牢甚然燻與世蕃併異姓假子非某血胤覆宗絕嗣之禍先受之而小人自愚耳迨其後阮大鍼則曰甯可終身無子不可一日無官覆載生成何以厭其欲哉此又檜嵩之罪人也夫阮大鍼亦無子云

齋於此又命高文樞人出夫詞大燻衣燻于云

限日甯可終身無子不可一日無官覆載生成何以厭其

欲哉此又檜嵩之罪人也夫阮大鍼亦無子云

齋於此又命高文樞人出夫詞大燻衣燻于云

限日甯可終身無子不可一日無官覆載生成何以厭其

楊忠愍傳

公諱繼盛字仲芳號椒山容城人嘉靖丁未進士授南吏部驗封司主事辛亥遷兵部車駕司員外郎時咸甯侯仇鸞驟得兵政心憚虜欲利啖之以緩兵請於二邊開馬市有成議矣公上疏力爭之曰夫互市者和議之別名也其不可者有十俺答蹂躪我陵寢虔劉我赤子而與之議和忘天下之大仇一不可也北伐之詔下天下曉然知聖意日夜輸兵食以助京師而忽更之曰和失天下之大信二不可也以堂堂天朝而下與邊臣互市冠履倒置損國家

前明忠義別傳

卷三

十四

之大威三不可也天下豪傑摩厲以待試而甘心歛謂國家厭兵無所用之曠天下豪傑效用之誠四不可也庚戌之變頗講武事今無故言和使邊鎮偷安懈天下飭武之志五不可也往者邊臣私通外寇吏猶得以法裁之今導之使通其不勾結而危社稷者幾希開邊方交通之門六不可也伏戎之莽在在有之惟畏國威不敢恣肆今謂國家勢弱而議和啓內地不靖之漸七不可也俺答深入雖未見一兵交戰然彼知我無備也備之已半歲而以互市終之彼謂朝廷尙有人乎長俺答輕中國之心八不可

也俺答狡詐本非誠款我竭財力而輦之邊彼負約不至固未可知或互市卽入寇詭稱別部或以駕馬索上價或責我以他賞俱未可知墮俺答狡詐之術九不可也俺答之產馬有窮中國之生財有限歲帛數十萬市馬數萬匹彼馬少我財帛已竭將何以善其後不爲國家久遠之謀十不可也彼倡爲互市之說以欺誑皇上者其謬說不過有五曰外開馬市以羈縻之內實寬吾以修武備夫俺答至無厭也至無恥也請開馬市之後別有所請許之再有所請又許之一不如意彼卽違約是彼之入寇爲有名我前明忠義別傳

卷三

白手取我重利矣是市馬則獲小利而無名逆貢則雖有名而費大市馬固不可許通貢又豈可許哉此其說之謬三也曰俺答性直最不失信觀其聲言某時搶某處並不愆期既許互市保其斷不入寇不知彼之種數日繁加以擄掠人口日益衆其服食器用皆仰給於中國市馬之利不供所需且彼非盡皆義士安肯堅守小信自甘凍餒以至於死乎縱使羈縻不過暫保二三年無事後將何以處之此其說之謬四也曰佳兵不祥不可輕用與其勞師動衆而勝負難必孰若許開馬市休兵息民急修內治之爲

愈乎噫爲此說者損國家之兵威壞天下之大事必自此始矣若曰佳兵不祥則舜征有苗湯伐葛伯高宗伐鬼方文王遏莒豈盡皆不祥者哉春生秋殺上天生物之道也恩賞兵刑王者御世之權也譬如人身四肢皆患癰疽毒日內攻乃猶專食膏粱而憚用藥石尙能保其生命乎此其說之謬五也觀此則馬市之開不利於我中國明矣而於俺答則甚利焉蓋數十年來寇以中國之百姓爲佃戶秋後則入而收其租雖已得計猶有往來奔走之苦晝夜殺人之勞去年入犯我莫敢敵虛實旣已覘矣故今請開

馬市欲坐收中國之利况馬多擄自中國者冬春草枯則市之秋後馬肥則入而擄之及至來春則又市之循環取利是昔日彼猶爲出門討租之人今日我則爲上門納租之戶臣言及此憤恨何極此事利於俺答不利於中國滿朝臣子皆知其不可然有人議而行之無一人敢非而止之議而行之者苟延旦夕遑恤其他不敢非而止之者大家因循鶻突莫肯冒禍擔當臣以孤寒進士初入仕途父母早喪妻子孱弱非不知隱忍足以自保言事足以取禍竊惟皇上初時震怒奮武其氣若此之壯命將征討其志

前明忠義別傳

卷三

七

若此之勇則知今日馬市之開乃議者之奸計非皇上之本心以皇上之英武而臣下庸懦避事如此良可痛恨伏乞垂念愚臣之罪言追思欲討之初志收回成命銳意戎兵臣請爲皇上勒銘燕然懸俺答之首於藁街以示天下疏入上壯之下大臣議鸞詆公撓邊計惑眾詔錦衣衛訊杖貶狄道典史公至則買山一區建道統祠召邑之諸生講學其中又倣古井田意教民農桑民皆瞻足彬彬多向學者而巡按劉某聞公賢牒取赴鞏昌書院教兩府諸生公病其不以禮徵辭之不得則復以書曰夫古之虞人庶

人猶知守己之正職官雖卑賤其志肯甘虞庶下哉本院  
如召之以有司之事則固典史之職也職敢不以分自處  
乃拒上官之命今召之以教訓生徒則有師道存焉職又  
安敢不以禮自守乃淪於辱身枉道者之爲苟謂職卑賤  
無可取也固宜踐踏之不足不當付以師道之重如謂庶  
幾可以充師任則固賓師之責也未聞欲延師者乃治之  
以官府套數之常今之師道不立久矣古之師道則可稽  
也或求諸市井或求諸山林或求諸草茅田野之間故雖  
古之明王必致敬盡禮後之霸王亦知卑禮厚幣凡以師  
前明忠義別傳

卷三

六

道尊嚴不可挾勢位以屈之也本院有志書院是志欲行  
古道者欲行古道乃不能脫勢位之套而挾之憲牌提取  
若僕隸然一則曰毋得遲緩再則曰毋得遲緩是以典史  
召之也夫旣以典史召之職敢不尊朝廷之謫命守典史  
之官職而乃爲出位不往乎且古之設書院者專以講明  
道理今爲書院計而挾勢位以延其師則所謂書院者不  
過利祿之淵藪功名之筌蹄耳其於斯道何所補哉故雖  
不爲此亦可也職赴任以來其處上官僚友不敢一毫僭  
越今乃若與本部抗者非敢固傲取罪蓋位之所在雖不



敢諭而道之所在亦不可苟如以牌而取遵牌而往不惟  
取知道之笑其如師道之不立何是職之卑賤不足惜而  
師道之不立深可惜也嗚呼書院盛事也延師盛舉也本  
院負其勢欲其入而閉之門卑職守其道甯喪溝壑而不  
顧且恨此相遇之所以甚殊而盛事之所以難成也盛伏  
乞稽諸理恕其狂矜其愚而不錄其罪無任悚懼之至蓋  
公之守正不阿雖造次顛沛猶如此云俺答數敗約入寇  
仇鸞奸復露罪至族公言大讎天子思之稍遷山東諸城  
令月餘遷南京戶部主事三日復遷刑部湖廣司員外郎  
前明忠義別傳

卷二

九

道復調兵部武選司當是時嚴嵩最用事惡鸞刺骨而善  
公策以不得立貴之爲恨然天下之惡嵩甚於鸞公始遷  
刑部郎欲移疾歸旣復調兵部則中夜坐不寐曰天子遇  
我厚矣何以報夫人張從旁笑曰公休矣且歸耳一仇鸞  
困公幾死今嵩父子百鸞也安容直言公霍然大悟曰吾  
乃今而知所以報也遂密具疏劾嵩不抵家取道赴京師  
齋三日以正月十五日亡其之畧曰臣前諫阻馬市荷蒙  
聖恩薄罰降謫不二年間復陞今職臣蒙此莫大之恩思  
所以捨身圖報之道未有急於請誅賊臣者也方今在外

之賊惟俺答在內之賊惟嚴嵩賊有內外攻宜有先後未有內賊不去而可以除外賊者故臣請誅賊嵩當在勦絕俺答之先臣敢以嵩之專政叛君十大罪爲皇上陳之我太祖高皇帝罷中書丞相立五府九卿分理庶政殿閣之臣惟備顧問視制草祖訓曰有建言設立丞相本人凌刷全家處死及嵩爲輔臣儼然以丞相自居凡府部題覆先而稟而後敢起稿嵩之直房百官奔走如市一或少違顯禍立見及至失事又謝罪於人嵩雖無丞相之名而有丞相之權有丞相之權而無丞相之責壞祖宗之成法一大

前明忠義別傳

卷三

三

罪也權者人君所以統馭天下之具不可一日下移嵩以票本自任遂竊威福之權用一人曰我薦之也黜一人曰此得罪於我也凡少有得罪於下者雖小心躲避亦尋別本帶出旨意報復陷害羣臣感嵩甚於感皇上畏嵩甚於畏皇上竊人主之大權二大罪也善則歸君過則歸己人臣事君之忠也皇上有一善嵩必令子世蕃傳播於人曰上初無此意我成之編輯聖諭及嵩所進揭帖刻板頒行名曰嘉靖疏議使天下後世謂朝廷善政皆出於彼掩君上之治功三大罪也皇上令嵩崇本蓋君逸臣勞之意嵩

乃令子世蕃及義子趙文華代擬如經歷沈鍊劾嵩一疏發大學士李本擬旨本卽送世蕃同文華擬上嵩旣以臣竊君之權世蕃卽以子操父之柄京師有大丞相小丞相之謠縱奸子之僭竊四大罪也邊事之廢壞皆原於功罪賞罰之不明嵩欲其孫得官故先置伊表姪歐陽必進爲兩廣總督竄孫嚴效忠名征蠻奏捷陞鎮撫效忠告病嚴鵠襲替加陞錦衣衛千戶冒海疆之軍功五大罪也仇鸞總兵甘肅以貪虐論革世蕃受鸞重賄薦爲大將後知皇上疑鸞始發其過惡以掩前迹是通寇者鸞引用鸞者嵩

前明忠義別傳

卷二

三

父子也進賢受上賞進不肖受顯戮嵩之罪惡又出鸞之上矣引背逆之奸臣六大罪也俺答犯京深入失律我軍奮勇擊其情歸此一大機也嵩乃謂兵部尚書丁汝夔曰京邊不同勢敗於邊可掩也敗於京不可掩也且俺答飽自退耳以故汝夔傳令不戰及皇上逮治汝夔嵩又曰無恐也吾爲密疏保若蓋恐汝夔招出真情故將此言啜哄以安其心汝夔亦恃嵩平日有回天手段故安心不辯及汝夔臨刑始知爲嵩所紿乃大呼曰賊嵩害我誤國家之軍機七大罪也黜陟人君之大權非臣下所得專且私也

刑部郎中徐學詩以論劾嵩與世蕃革任爲民矣又於考察京官時罷其兄中書舍人徐應豐戶科都給事中厲汝進以劾嵩世蕃降典史矣又於考察外官時諭吏部削汝進籍夫考察大典也皇上持之以激厲天下之人心賊嵩竊之以中傷天下之善類亂黜陟之大柄八大罪也府部之權旣撓於嵩而吏兵二部大利所在尤其所專主者於文武官之陞遷不論人之賢否惟論銀之多寡各官之任亦迫不以報國爲心惟日以賄嵩爲事將官旣納賄於嵩不得不剝削乎軍士所以軍士多至失所有司旣納賄於

前明忠義別傳

卷二

三

嵩不得不濫取於百姓所以百姓多至流離失天下之人心九大罪也我朝風俗醇厚逆瑾用事始變嵩爲輔臣諂諛以欺乎上貪污以率其下天下化之以守法爲固滯以彌縫爲通敏以清介爲矯激以奔競爲練達使人不復知有廉恥壞天下之風俗十大罪也嵩有十大罪昭人耳目而皇上若不知者何哉蓋有五奸以濟之嵩以賄結皇上之左右皇上一言一動無不報嵩凡聖意所愛憎嵩先預知故得遂其逢迎之巧是皇上之左右皆賊嵩之間諜奸一通政司納言之官嵩令義子趙文華爲之章疏至司先

閩副封少有干涉卽爲彌縫御史王宗茂劾嵩之本停五日方上是皇上之納言乃賊嵩之警犬奸二嵩內外彌縫周密所畏者厥衛衙門緝訪之也令世蕃締結姻親夫旣與之親又豈忍發露其惡皇上試詰嵩之諸孫所娶者誰氏之女則可知矣是皇上之爪牙乃賊嵩之瓜葛奸三厥衛旣已親矣猶慮科道言之嵩於進士初選時非親知不得與中書行人之選知縣推官非通賄不得與給事御史之列是皇上之耳目皆賊嵩之奴僕奸四科道已入其籠絡部臣亦可慮也嵩又令世蕃視各部之有才望者網羅前明忠義別傳

卷三

三

門下其有異議卽時斥逐是皇上之百司多賊嵩之心腹奸五五奸一破則十罪立見皇上何不忍割愛一賊臣顧忍百萬蒼生之塗炭乎臣前諫阻馬市謫百邊方往返一萬五千餘里道塗艱苦妻子流離宗族賤惡家業零落幸復今官僅將一月臣雖至愚非不知與時浮沉可圖報於他日而顧履危冒險攻難去之臣艱難成之功取必至之禍哉願皇上以再生之恩賜臣臣安忍不捨再生之身以報皇上每恨壞天下者逆鸞與嵩鸞已殛死獨嵩尙在嵩之奸惡又倍於鸞將來爲禍更甚使舍此不言再無可以

報皇上者臣如不言又再有誰人敢言乎伏望皇上聽臣之言察嵩之奸羣臣畏嵩固不必問也皇上或問二主令其兩陳嵩惡重則置之憲典以正國法輕則諭令致仕以全國體內賊去而後外賊可除也疏入上怒公慙嵩方以他事得上意構公下鎮撫司詰問何自引二王公對曰非二王疇不懼嵩者且王家事渠甯不憂爲嵩賤耶獄上詔杖至百有湖廣王之誥遺公蟒蛇膽謂服之可以禦杖公曰椒山自有膽却之談笑受杖竟論死夫人上疏請代曰臣夫楊繼盛先任兵部車駕司因諫阻馬市預伐仇鸞逆前明忠義別傳

卷二

五

謀聖恩僅從薄謫因鸞敗首賜煎洗一歲四遷歷抵前職臣夫拜命之後銜恩感泣祈圖報效或中夜起立或對食忘餐臣所親見不意謾聞市井之談尙狂書生之習一時昏昧遂發任言復荷聖恩不卽加誅俾從吏議臣夫自杖後入獄死而復甦者數次剝去臀肉兩片斷腿筋兩條膿血流五六十碗渾身衣服盡皆露汗日夜籠籠備極苦楚又年荒家貧常不能給臣紡績餉食已經三年該部兩次奉請俱蒙特允監候是臣夫再蹈於死而皇上屢置之生但聞今歲題奉欽依依律處決臣夫雖復捐軀市曹亦將

瞑目泉下然臣仰惟皇上方頤養冲和保合元氣昆虫草木皆欲得所豈惜一廻宸顧下逮覆盆倘蒙鑒臣螻蟻之私少從未減不勝大幸若以罪重不赦願卽將臣斬首都市以代臣夫之死臣夫雖遠禦魑魅親執戈矛必能爲疆場效命之鬼以報皇上臣於九泉稍有知識亦銜結無盡矣疏奏爲嵩所持不得上遂以十月乙卯晦斬西市臨刑賦詩云浩氣還太虛丹心照千古平生未報恩畱作忠魂補益慷慨曼聲長嘯以歿公繫獄時有吏應生者周旋左右尙書屢禁之不爲動而王公世貞徐公中行吳公國倫

王公世懋職橐膳兵部侍郎王公遜卽獄中以女許配公次子應箕公赴義時執手泣訣經紀其喪或怵以禍勿恤也公生平動履本末具見公所自爲年譜予不著撮其大者公歿之七年嵩奸狀大露上採御史鄒應龍言逐之歸戍其子世蕃又二年御史林潤白世蕃大逆狀論棄市籍其家貲鉅萬萬削籍寄食於人以死隆慶初贈公太常寺少卿諡忠愍予祠祀廕其子太學生萬歷三十九年保定知府武文達建祠於保定西郊通衢之東岡鑄巖嵩父子仇讐三鐵像北向跪供謁公祠者椎擊之

外史氏曰嗚呼士君子圖事揆策不患乎言之不驗患乎  
驗矣而君不信信矣而慕用之不誠也若公之竭智盡忠  
帝之悔悟寵錫斥未久而賜環官一歲而屢遷臣主相知  
固已入肘腋而通寤寐則當轉圜加膝之時乘疾雷破柱  
之勢爲除惡務盡之謀區區恃有獨契耳公嘗謂同年友  
王公繼津曰君才當大展姑畜歛鋒銳勿徒惟盡其心而  
不計事之成否人皆知致身爲忠不知爲天下愛其身尤  
爲忠之大者然則公之自愛從可知矣公初亦欲請告山  
居涵養數年然後出而任事及一歲四遷則又自嘆天不  
前明忠義別傳

卷三

三

成就用之太早幾非在我無可如何而世且詆公以愚慥  
取重禍此世所以多亂臣賊子也



公諱瑞字應麟號剛峯瓊州人嘉靖己酉舉人以母老家貧就南平教諭初至詣上官止長揖曰吾師席也可屈膝乎尋進淳安令清苦自勵總制胡宗憲一日語藩臬曰昨聞海令爲母壽市肉二斤矣蓋異之也公丰骨嚴厲蘊義風生所彈劾不避權貴事在必爭垂紳正笏不能奪嘗嘆舉朝柔懦無爲皆婦人女子以此嫉之者眾至有誣公大奸極詐欺世盜名誣聖自賢損君辱國者顧公不少挫也鄙懋卿負嚴嵩勢以中臺出理鹽政張甚將徃徽之齊雲前明忠義別傳

卷三

七

檄所過郡縣供辦令甚峻公爲書語懋卿邑小不足奉迎至且見罪願取他道往懋卿得書色變罷齊雲行而峽巡鹽御史袁淳以他事劾公謫興國判踰年遷戶部主事世宗初年卽事立修己而惑於方士長生之說益倦勤惟攝淨西苑郊廟不親朝講久廢而祈禱齋醮土木工作繁費宏多大臣宰相競以青詞阿上意公於是上疏曰陛下卽位初年敬一箴心冠履辯分除孔廟之像立啓聖之祠天下忻忻謂煥然更始無何而銳精未久妄念牽之謬謂長生可得一意立修大興工木二十餘年不視朝政法紀弛

矣數行推廣事仰名器濫矣二王不相見人以爲薄於父子以猜疑誹謗戮辱臣下人以爲薄於君臣樂西苑而不返大內人以爲薄於夫婦天下吏貪民不聊生水旱頻仍盜賊滋起加以賦役日繁盡室懸罄人因卽皇上紀元之號而臆度之曰嘉靖者言家家淨盡而無財用也然而內外臣工修齋建醮相率進香仙桃仙藥相率表賀陛下誤爲之羣臣誤順之臣愚謂陛下之誤多矣大端在齋醮齋醮所以求長生也堯舜禹湯文武未嘗久生於世漢唐宋方士亦未有至今存者陛下師事仲文而仲文已死彼旣不能保其身陛下何獨神其術乎至仙桃仙藥怪誕尤甚桃必採而後得藥必搗而後成茲無因而至有脛行耶云天賜之有手授耶陛下玄修多年一無所得則玄修之無益可知矣誠翻然悔悟且旦視朝與廷臣講求天下利害洗數十年君道之誤置身堯舜禹湯文武之域使諸臣亦洗數十年阿君之恥置身臯夔伊傅周召之列民物熙洽烝爲太和陛下性中真樂也道與天通命由我立陛下性中真壽也此理之所有可旋至立效乃懸思服食不終之餌鑿想造與輕舉之方切切然散爵祿精神求之終身

而不得大臣持祿外爲諛小臣畏罪面爲順君道不正臣職不明此天下第一事也疏入上大怒廷杖六十下錦衣衛獄中外縉紳相顧失色而公直聲亦遂聞天下是爲嘉靖四十五年正月也是年十二月上崩於斯時也獄吏知公必赦以肉餉公公度有旨赴西市則盡飲噉吏曰公今何啖耶公曰欲作飽鬼耳吏曰不然皇上賓天矣新君必赦公故以相賀耳公大哭卽嘔出所食而罷穆宗卽位首釋公復其官尋改兵部主事累遷至南京通政遂以僉都御史撫應天公威名久著羣吏多憚公望風解印去權豪

前明忠義別傳

卷三

完

怙勢之家宰相戒毋敢犯一顯者赭其門以居聞公至卽易去中人監造者以八人肩輿行亦減其半吳俗貧富相傾公獨翼庇窮民而摧抑士大夫之豪有力者是時吳中貴人無踰華亭相按問其家無少貸自是士大夫之名貪暴者多竄迹遠郡以避小民始忻忻有更生之望矣然公竟以是府怨而議者亦以此中公遂解官歸張居正當國奪情起復好事者冒公姓名刊布疏稿居正命巡按廣東御史密訪之公方鋤園使者入其家四壁蕭然訊以朝政皆不知亦未聞居正父計音也嘆息而去起南吏部侍郎

陞右都御史掌南院南都爲養望地官號吏隱公以爲南  
臺猶北也欲正百官必自御史始一御史爲戲宴公集諸  
御史痛懲之自是大僚至丞郎無不凜然奉法無敢縱聲  
伎劇飲爲宴樂者雨花秦淮牛首燕子磯諸處官艇遊展  
頓絕往時豪猾屏息莫敢出而公未嘗苛求公退靜坐而  
己未幾卒於官貧不能具棺士大夫醵金以殮士民哭之  
罷市數日喪出江上白衣冠送者兩岸無隙地簞食壺漿  
之祭數百里不絕御史陳海樓夙憾公聞公卒入視見萬  
幃蔽衣有寒士所不堪者乃曰廻吾怨恨之心矣計聞上  
前明忠義別傳

卷三

三

震悼贈吏部尚書太子少保謚忠介賜祭遣行人護喪歸  
葬

外史氏曰嗚呼唐以楊綰爲相制下之日朝野相賀郭子  
儀方宴客聞之減坐中聲樂京兆尹黎幹騶從甚盛卽日  
省之止存十騎中丞崔寬第舍宏侈亟毀之公之風節甯  
多讓惜乎縮相而公獨居外不得一曰立於朝廷之上則  
有忌嫉之者也神宗諭祭公文謂高標絕俗直道視身視  
斯民由已飢寒恥其君不爲堯舜矢孤忠而叩闕抗言增  
日月之光出百死以登朝攬轡勵澄清之志迨起家於再

廢乃浹歲而三遷巖石具瞻卓爾舊京之望素絲無染哀  
然先進之風綜銓務而議主懲貪領法臺而政先釐弊若  
金在治百鍊彌堅俟河之清九泉莫及可謂深知公者矣  
然語出於詞臣之手不然知其賢而疏且遠之其奚異於  
郭公之好善乎崇正甲申三月公石坊鑄石處泚然血下  
見者懼其家禍拭之復出至十九日乃止公歿百餘年精  
誠在天地海濱萬里與君國存亡冥通呼吸豈不亦神矣  
哉

前明忠義別傳

卷二

三

公在時... 忠義... 崇正... 甲申... 三月... 公石坊鑄石處泚然血下... 見者懼其家禍... 拭之復出... 至十九日乃止... 公歿百餘年... 精誠在天地海濱... 萬里與君國存亡冥通呼吸豈不亦神矣哉

前明忠義別傳卷四

張姬石三縣令合傳

張公諱振德字季修崑山人以選貢授四川興文知縣天啓元年永甯酋奢崇明爲亂殺巡撫藩臬據重慶當是時公署長甯縣賊鋒逼興文而長甯去賊稍遠公方被檄入圍聞變疾趨還從者欲走長甯公以守興文爲正趨入縣而賊猝至公督鄉兵與戰力盡援絕退集居民城守會大風雨賊毀土城入公度不支入署命妻錢二女淑昭淑慶等人持一刀坐後堂曰若輩死此吾死前堂左手持兩印

前明忠義別傳

卷四

一

右手秉匕首危坐賊至佯慰曰無恐公叱曰大丈夫從容就義何恐之有俄而賊焚民舍公曰此吾授命時矣遂率家人北向拜曰臣奉職無狀不能殺賊惟一死明志妻女先伏劍死薪上僕婦皆從乃命家人舉火火熾自刎一門死者九人事聞贈光祿卿謚烈愍而長甯主簿徐大禮者聞公死嘆曰張君教我矣城破之日亦仰藥而絕明年有

姬公死滕縣之事

姬公諱文胤字士昌華州人萬歷癸卯舉人天啓二年爲滕縣令履任三日而白蓮賊徐鴻儒攻滕時滕民十九從

賊公率以登埤僅數十人問民何以從賊曰禍由董二董  
二者延綏巡撫董國光子也居鄉貪暴民不聊生故爲亂  
公呼賊曰若等以董二故挺而走險吾爲治其罪以雪若  
寃而赦若等可乎公長身赤面鬚髯奮張唇齒如施丹漆  
呼聲殷殷動樓櫓賊望見以爲神人歡呼羅拜俄而董二  
之黨暗發箭斃賊賊謂公給之大憤肉薄而上城遂破公  
緋衣坐堂上嚼齒大罵胡不速殺我賊不忍勸之去不可  
爲詩入章書於壁解印付小吏魏顯照及僕李守務北向  
再拜自縊死賊拷掠顯照索印不予與守務罵賊並死之

前明忠義別傳

卷四

二

事聞贈公太僕寺少卿並錄顯照守務復其家而董二遁  
去其後卒以賄免明年又有石公死長興之事  
石公諱有恒字季常號雲岫黃梅人萬歷己未進士授浙  
江遂安令調長興時劇盜葉朗山吳野樵等結島寇爲亂  
剽掠無虛日公設方畧擒其魁賊稍戢而餘眾散處湖蕩  
間公分兵搜捕甚急癸亥正月朔賊乘元旦節詭裝突入  
城大肆焚掠公聞變出立廳事辦嚴賊露刃脅之公叱曰  
草賊敢叛天子殺王臣耶索印不可強之行不可以刃傷  
其長子確亦不顧賊擁之出儀門公曰頭可斷此限不可

踰也遂被害血上瀆移時不仆主簿徐可行奔赴亦死之  
賊搜其篋無所得相顧驚歎稱爲真正清官贈太僕寺少  
卿謚忠烈嗚呼熹宗之時賊禍已如此其屠陷城邑先後  
以死殉者不可勝紀也吾得數人焉其他抗節者野史及  
諸家傳記頗往往附見矣然或崖略而不詳亦或依違瞻  
徇拘牽志諱宜傳者而不傳幸託於諸家傳記者或文不  
能行遠則雖傳猶不傳又或有如昌黎廬陵輩間世而出  
或不幸不及知知而未暇爲時往事移鄉里鮮有能舉其  
姓字者則忠魂義魄噉狐貉而隨飄風黃土青燐憂悲沉

前明忠義別傳

卷四

三

痛亦付之無可如何而已矣豈不惜哉予故謹次而錄之  
南溪則知縣王碩輔守城禦寇力屈死灌縣則知縣左重  
督兵援省與賊對陣死遵義則推官馮鳳雛罵賊死司獄  
蘇樸墜城死威遠則經歷袁一修亦墜城死大足則主簿  
張志譽典中宋應臯與賊持四晝夜並僕張成俱戰死合  
州則邪官原任鞏昌同知董盡倫率眾殺賊死永甯則鄉  
官原任松潘道叅政李忠臣約眾擒賊謀洩賊掩至被執  
不屈死舉人胡復亦死之瀘州則鄉官原任應天通判高  
光削髮作偈曰君父誼尊削髮自盟臣子守定留鬚爲證



與子諸生高在峴募兵復城殺賊百人死重慶則巡撫徐  
可求罵賊死巡道孫好古駱日升相對自經公署知府章  
文炳推官王三宅郭象儀楊愈懋同知王世科熊嗣先知  
縣段高選訓導趙燿典史吳應元縣丞蕭美葛盛德總兵  
黃好魁參將萬金守備劉自靖孫世侯毛民望王守忠李  
繼周遊擊李縉指揮王登爵韓應泰崔英李世勳李承宗  
鎮撫郁聯若干總王成龍千戶鄭應欽百戶范之偉張羽  
汪起蛟俱戰死嗚呼是數公者具見於鄒漪野乘其出處  
本末與死事年月皆未之詳予亦未暇深考也抑又聞張  
前明忠義別傳

卷四

四

烈愍公殉難後教諭劉公希文華容人貢生署縣事甫半  
載賊復至城破妻白氏從容語曰君爲臣死予爲君死盡  
遣去家人同罵賊以殉此則其本末略可考者矣吁

黃國初 萬金 守備 劉自靖 孫世侯 毛民望 王守忠 李繼周 遊擊 李縉 指揮 王登 爵 韓應泰 崔英 李世勳 李承宗 鎮撫 郁聯 若干 總 王成龍 千戶 鄭應欽 百戶 范之偉 張羽 汪起蛟 俱戰死 嗚呼 是數公者 具見於 鄒漪野乘 其出處 本末與 死事年 月皆未 之詳予 亦未暇 深考也 抑又聞 張前明 忠義別 傳

公諱銓字宇衡沁水人萬歷甲辰進士授保定推官擢御史巡視陝西茶馬內艱歸起按江西時遼東總兵官張承蔭敗歿而經略楊鎬方議四道出師公馳奏言敵山川險易我未能悉知懸軍深入保無抄絕且突騎野戰敵所長我所短以短擊長以勞赴逸以容當至非計也昔疆胸河之戰互將不還奈何輕出塞爲今計不必徵兵四方但當就近調募屯集要害以固吾圍厚撫北關以樹其敵多行間諜以攜其黨然後伺隙而動若加賦選丁騷擾天下恐

前明忠義別傳

卷四

五

識者之憂不在遼東因請發帑金補大僚宥直言開儲講先爲自治之本又言李如栢杜松劉綎以宿將並起宜責鎬以一事權唐九節度相州之潰可爲明鑑又言廷議將恤承蔭夫承蔭不知敵誘輕進取敗是謂無謀倅與敵遇行列錯亂是謂無法率萬餘之衆不能死戰是謂無勇臣以爲不宜恤又論鎬非大帥才而力薦熊廷弼四十八年夏復上疏言自軍興以來所司創議加賦增銀三釐未已幾至七釐又未幾至九釐譬之一身遼東肩背也天下腹心也肩背有患猶藉腹心之血脉滋灌若腹心先潰危亡

可立待竭天下以救遼遼未必安而天下上危今宜聯人心以固根本豈可賸削無已驅之使亂且陛下內廷積金如山以有用之物置無用之地與瓦礫何異乃發帑之請叫闈不應加派之議朝奏夕可臣殊不得其解蓋神宗初載張居正當國海內甯謐民則人給家足居正去遂多故掎克日用事國計浸以促耗自萬歷二十年甯夏用兵費帑金二百餘萬其冬朝鮮用兵首尾八年費帑金七百餘萬二十七年播州用兵又費帑金二三百萬三大征接踵國用大匱而二十四年乾清坤甯兩宮災二十五年皇極

建極中極三殿災營建之資以鉅萬萬而遼難日亟軍興益以繁費於是礦稅之使四出縱橫繹騷吸髓飲血天下蕭然生靈塗炭公所言皆關軍國安危而帝與當軸卒不省綖松敗時謂公有先見云熹宗卽位出按遼東經略袁應泰下納降令公力爭不聽曰禍始此矣應泰字大來鳳翔人萬歷乙未進士用兵非所長規畫頗疎廷弼在遼持法嚴部伍整肅應泰以寬矯之多所更易而是時蒙古諸部大饑多入塞乞食應泰言我不急救則彼必歸敵是益之兵也乃下令招降於是歸者日衆處之遼瀋二城優其

月廩與民雜居潛行淫掠居民苦之議者言收降過多或陰爲賊用或敵雜間諜其中爲內應禍且叵測應泰方自謂爲得計將借以抗大兵會三岔兒之戰降人爲前鋒死者二十餘人應泰遂用以釋羣議明年天啓改元三月十有二日大兵攻瀋陽總兵賀世賢尤世功出城方戰敗還明日降人果內應城遂破二將戰死總兵陳策董仲揆等赴援亦戰死公請令遼東巡撫薛國用帥河西兵駐海州剿遼總督文球帥山海兵駐廣甯爲聲援疏甫上而遼陽失守矣方遼陽之被圍也公與應泰分城守已而勢不

前明忠義別傳

卷四

七

支應泰謂公曰泰不才微尙方靈寵固誓以身許按臣無闕外責尙可收拾餘燼退保河西以圖再舉公不可曰吾世受國恩豈有城破身存之理守三日城破被執不屈欲殺之引頸就刃帥知不可奪送之歸公曰歸亦何顏速死爲幸則以輿送之不從以馬送之不從乃令二人夾持之送還署衣冠向闕拜又遙拜父母遂自經事聞贈大理卿再贈兵部尙書謚忠烈父五典歷官南京大理卿時侍養家居詔以公所贈官加之及卒贈太子太保初五典度海內將亂築所居竇莊爲堡堅甚崇正四年流賊至五典已

歿獨公妻霍氏在衆請避之曰避賊而出家不保出而遇賊身更不保等死耳盍死於家乃率僮僕堅守賊環攻四晝夜不克而去副使王肇生名其堡曰夫人城鄉人避賊者賴以免公形貌魁傑豐頤廣顙頰顏而髯望之知爲偉人先是保定有兩是亭以祀楊中丞繼宗許忠節達公理郡夢入亭兩公向公而揖曰方虛席以待殆先徵云同時殉難者有守道何公監軍崔公

何公諱廷魁字汝謙山西大同人萬歷二十九年進士授

涇縣令調甯晉遷刑部主事歷歸德衛輝河南知府西甯

前明忠義別傳

卷四

八

副使坐考功法復爲黎平知府會遼事棘遷副使分巡遼陽袁應泰納降公爭不聽乃貽書家人曰吾不知死所矣潘陽陷同事者遣孥歸公曰吾不敢爲民望 大兵渡河

公請乘半渡擊之應泰不從俄薄城圍未合請盡銳出禦

又不從城陷泣語左右曰吾負若屬其自爲地無顧我也

懷印率其妾高氏金氏並二女投井死僕婢從死者六人

都司徐國全亦死之事聞贈光祿寺卿再贈大理寺卿謚

忠愍

崔公諱儒秀字傲初河南陝州人萬歷二十六年進士歷

戶部郎中遷開原兵備僉事時開原已失公辭墓而行曰  
觀天象遼難未弭且經略臨之在上進止非司道所得專  
唯以身殉耳散家貲募健兒八百人部勒偕行袁應泰以  
兵甲馬仗不足恃爲憂公曰恃人有必死之心耳應泰深  
然之無何納降議起公力諫不聽大兵攻遼陽公分守  
東城矢集如雨不少却頃之應泰所拔精兵先自潰降兵  
競起刃人於衢城陷有欲挽公潰圍出者正色拒之慟哭  
戎服北向拜自經死事聞賜恤視何公廷魁賜額曰愍忠  
以陳公輔堯段公展配祀陳公字九室揚州人萬曆中鄉

前明忠義別傳

卷四

九

舉歷永平同知轉餉出關與自在知州段公駐瀋陽天啟  
元年日暈異常段公牒應泰言天象示警宜豫防瀋陽破  
段公死之陳公方奉命印烙左右以無守土責勸之去陳  
公曰孰非封疆臣何去爲望闕拜拔刀自刎死與段公並  
贈按察僉事段公涇陽舉人嗣是殉遼難者有叅政高公  
高公諱邦佐字以道山西襄陵人萬曆乙未進士授壽光  
令歷官陝西叅政乞養歸天啓元年遼陽破起叅政分守  
廣甯遼東三面受敵自萬歷以來無歲不用兵而稅使高  
淮腹削十餘年軍民益困先後撫臣皆庸才玩愒苟歲月

天子又置萬幾不理邊臣呼籲漠然不聞致邊事大壞袁應泰承楊鎬之後復以納降敗於是熊廷弼爲經略而以王化貞爲撫廷弼負邊才性剛與廷臣不相能化貞駮而懷素不習兵然有奧援輔臣葉向高座主也本兵張鶴鳴私人也咸右之於是廷弼化貞日構隙公知事必敗母楊年八十餘涕泣不忍去母責以大義乃行己而念母老屢乞歸方報允而廣甯失先鋒孫得功者化貞心腹將也潛諭軍民降封府庫以待大兵未至城中已亂公禁之不能止化貞股慄不知所爲乘馬遁去衆謂公旣請告入

前明忠義別傳

卷四

十一

關公叱曰吾一日未去則一日封疆臣也將安之夜作書訣母策騎趨右屯謁廷弼言城中雖亂敗尙未知亟提兵入城斬一二人人心自定公卽不行請授邦佐兵赴難右屯廷弼所駐地去廣甯四十里兵止五千人廣甯兵十三萬糧數百萬廷弼心忮且憤化貞之齟齬也不納於是化貞走則亦走公仰天長歎泣語從者曰經撫俱逃事去矣松山吾守地當死此汝歸報太夫人遂解印綬自經僕高承曰王死安可無給使令於地下者亦自經於側事聞贈

外史氏曰嗚呼遼事至神宗之季益劇矣一壞於楊鎬再壞於袁應泰三壞於王化貞覆軍殺將失地喪師竭中國之全力徒以供三臣之驕僨遼未必安而天下已危情見勢屈彰明較著而當國者不悟又致廷弼以死也檀道濟曰壞汝萬里長城明運告終固不待甲申之歲矣

前明忠義別傳

卷四

十一



公諱三善字彭伯永城人萬歷二十九年進士由主事歷  
官至太常寺少卿天啓二年貴州水西土目安邦彥叛總  
兵楊愈懋推官郭象儀戰死遂圍貴陽分其黨破烏撒下  
甕安襲偏沅以阻援師全黔震動詔加公右僉都御史巡  
撫貴州公星馳抵平越所陳兵止萬餘人公大會將士議  
曰貴陽被圍外援不至吾輩失黔則死法進援則死敵等  
死耳奈何不以忠義自奮卽分兵三路以進令道臣何天  
麟督兵七千從清水江進爲右部道臣楊世賞督兵萬餘  
前明忠義別傳 卷四 三  
從都勻進爲左部而自與道臣向日升將二萬從中路進  
當賊鋒至龍頭營遇賊命劉超爲前鋒擊之斬賊驍將阿  
成諸賊奔潰公乘勢追擊之奪龍里城眾議去省會不遠  
賊必重兵堵截宜少休息公曰我兵猝至賊無備不能持  
久急擊之勿失遂策馬當前賊覘者聞新撫自將意大軍  
且至相顧駭愕安邦彥遁去賊退屯龍洞官兵奪高寨七  
里冲至畢節鋪殺賊無算殲其渠安邦俊棄輜重器械山  
積遂乘勢抵會城是爲壬戌正月也當此之時撫臣李樵  
按臣史永安學臣劉玄錫死守已十閱月城旦夕陷忽見

賊兵奔潰俄頃五騎至城下呼曰新撫來矣軍民大悅慶  
更生是役也公親冒矢石身先士卒以二萬人破賊十餘  
萬衆迎公入城公曰賊兵不遠軍心未定我大帥也不可  
卽安遂營於南城外坡上設帳大雪中令前鋒楊明楷率  
兵渡河營三十里外一屯廣陸一屯鴨池三年春正月邦  
彥復糾川賊奢崇明父子率衆攻廣陸楊明楷戰敗陷賊  
中公收兵入城邦彥因明楷兵敗煽誘苗民復犯貴州使  
其黨何中尉據龍里李阿二督四十八庄兵圍青岩斷官  
軍糧道自統水西兵約宋萬化吳楚漢率苗民共逼會城

前明忠義別傳

卷四

三

公遣游擊祁繼祖等奪龍里破蓮花堡燒上中下三牌焚  
賊寨百五十處何中尉逃入深箐龍里路通遣叅將王建  
中等救青岩斬賊三百餘級焚賊四十八庄李阿二中神  
鎗逃歸水西定番路通謀報賊方糾八姑蕩洪邊二路兵  
進犯會城公遣建中繼祖等統萬五千人夜入八姑蕩焚  
庄寨二百餘處斬首五百級窮追渡河溺死者無筭焚其  
積聚殆盡宋萬化遣人詐降覘動靜公佯許之卽調監軍  
楊世賞等捲甲赴之萬化倉皇出戰遂被擒並獲其妻子  
及僞軍師劉洪祖等萬化驍勇善戰邦彥倚之至是奪氣

而總兵魯直欽入賊巢擒土司何中尉等進營紅崖總兵張彥方敗賊於羊耳追至鴨池河奪其戰象斬首二百七十級四路旣通叛苗日相繼降公給黃旗使各樹寨中邦彥望見之不敢復出但於鴨池廣陸諸要路掘坑塹修補屯兵爲自守計七月賊起破普安勢復猖獗總督楊述中遠駐沅州畏賊不敢前朝命屢趣之始移駐鎮遠二意主撫公患其掣肘上疏乞休不許會奢崇明爲川師所迫逃依邦彥公欲出師述中力持不可公乃排羣議力爲籌畫以閏十月自將六萬人渡烏江十一日次黑石賊衆迎戰前明忠義別傳

卷四

古

連敗之斬前逃將單弘化以狗賊數失利退保漆山立柵拒守以老官軍官軍食漸乏諸將欲引還公曰汝曹欲退不如斬吾首詣賊降否則惟有戰耳諸將乃不敢言公直偪漆山服紼衣峨冠肩輿張蓋親督陣諸將曰若知吾意乎戰不勝此吾死所也顧旁一山頗峻揮左軍據其上而左右二路輕重布之賊不料官軍猝至倉皇拔柵悉銳爭山諸將殊死戰賊大敗遂焚其若邦彥遁走公按轡入大方降者千計賊遣人詣鎮遠乞降總督楊述中許之公以元宥未除當以勦爲撫而述中一意主撫議遂不合公

屯大方食盡述中弗爲援四年正月公拔營還貴州賊躡之中軍叅將王建中副將秦民屏戰歿賊令其黨陳其愚詐降公信之至是從行復傳其愚山後遇賊公勒馬回視其愚故縱轡衝公墜馬公知有變解印付家人令護持先行拔刀自刎未殊其愚奪其刀公大罵羅鬼擁至遂遇害監軍御史傅公宗龍獲陳其愚斬之邦彥崇明崇正二年俱爲總督朱燮元所戮分裂其地西南遂平先是述中與公議勦撫不合多方阻撓及公歿於王事按臣陸獻明爲公請卹述中修舊怨止叙將吏功並列死事諸臣而不及

前明忠義別傳

卷四

五

公給事中郭興言駁之所司不行公留心經濟自其家居時江湖之俠屠釣之豪翹鬪奮戰擊筩探丸之客皆畜養之多得其死力援黔時得邸報不肯發封識宛然舊撫李樞問故公曰吾正辦兵事何暇及此且朝議戰守紛紜每若聚訟觀之徒亂人意耳其堅決如此烈帝御極始贈兵部尙書太子太保同時有田景猷字觀野思南人初成進士值安酋叛上疏願奉天子威德諭令去逆效順上壯之拜職方卽遣行遂單騎造賊壘賊素懼其名厚禮之然不肯放還淹留二年會公解會城之圍軍聲大振景猷乃取

間馳至軍告以賊虛實遂大破賊而公乘勝窮追倉卒遇  
害兵皆散景猷下馬歎曰臣不能報陛下死有餘憾矣從  
容就死

外史氏曰嗚呼明之寇禍自天啓時已熾而撫之爲害督  
臣之剛愎掣肘亦早釀於是時覆軍在前後不爲鑒蓋賊  
臣之誤國固有氣類衣鉢不可得而勝誅已使如朱燮元  
之專征大創何嘗不奏蕩平哉彼非其以勦爲撫之明效  
乎而當局者卒憤憤也

前明忠義別傳

卷四

六

卷四

祭

軍者以地勢爲大如如而公乘其隙故卒敗

前明忠義別傳卷五

萬忠貞傳

公諱燦字元白一字闇夫新建人萬歷丙辰進士熹宗時爲工部主事管寶源局內監積廢銅數百萬公請發鑄濟工魏忠賢靳不與遂上疏曰夫以忠賢珠玉盈筭金銀滿屋如此破廢銅器無足入其目當其心而必一手握定者以爲不如是無以操天下之利權旣操天下之利權何難攬天不之政權奸人用意最深畜謀甚毒臣有以窺其微矣疏入忠賢憤恨欲甘心公及爲屯田司郎中往慶陵見

前明忠義別傳

卷五

一

忠賢墳瑩踰制拊膺歎曰何物么魔敢於逞逆至此復疏發其奸謂人主有政權有利權政權一日不握則德分圃池威分出彘而有尾大不掉之虞利權一日不操則竭澤而漁飛人而食而有毛將焉附之患太監魏忠賢口脚天憲手握王爵生殺予奪權盡爲有而所營墳墓制作規模儼同陵寢僭侈踰制抑又甚焉請正其罪以絕亂萌疏入忠賢遂矯旨杖一百闖人數十輩蜂擁牽衣摔髮而前杖後伏小璫於闕下梃擊椎刺踰四日而殞李公應昇上言曰燦死矣未報國恩先填溝壑六尺之孤繞膝八旬之母

倚閭旅櫬無歸游魂戀闕臣僚飲泣道路咨嗟然共知非出於陛下之心也臣不暇爲燦寃爲陛下寃損好生之德負殺諫臣之名豈所以作忠勸士哉夫人臣緘口以待遷厚利也危言以招戮實禍也身死而天下悲其忠虛名也舍保身家榮妻子之計博此虛名饑不可食寒不可衣將焉用之况乎傷殘父母之遺體以從龍比於九京人非僕隸法非訊囚罪至死刑命非草芥廷杖之舉殊失士心直俟公論明而恤死錄孤嗟何及矣被旨以瀆擾詰責黃公尊素發憤言曰律例所載雖叛逆十惡應死者猶且反覆

前明忠義別傳

卷五

二

於庭議鞫訊之間今以披肝瀝膽之臣子枉死於壘蔽之左右必且忻忻相告曰吾儕借天子之尊今而後可以立威可以箝口矣不知輕用皇上之威顛倒在一時而長留殺諫之名貽譏在萬世他日有秉董史之筆者書曰某年月日萬燦以言事死其奈之何進此廷杖之說者必曰祖制不知二正之朝王振劉瑾爲之世廟之時張孚敬與嚴嵩爲之神廟初年張居正爲之實非祖宗意也萬燦之杖也適與雨雹會六科廊之火也適與杖林御史會何其呼吸相應如此意者臣工之誠不足動至天意爲之震悚乎

疏上復又倡率臺省於東閣謂此後有傳旨廷杖者閣中當輒封還不可奉行聞人聞之競前咨口橫詈閣臣俯首不發一言自是厥後瑞勢益熾緹騎四出清流一網盡矣蓋熹宗之朝士大夫之被瑞禍者實自公始云

外史氏曰嗚呼傳曰刑不上大夫所以培士氣亦所以固國脉也三代以還人君遇其臣下等於犬馬而羣小竊弄抑又甚焉至有明廷杖則喪廉恥賤節義寵刑餘貴悍卒俾正人君子脫衣冠以就鎖繫屈體貌以聽武夫虧支體以受箠楚捐性命以供喜怒小人遂無忌憚士夫遂昧良

前明忠義別傳

卷五

三

心豪傑所以多山林之思變故所以少節槩之士也夫自設廷杖以來數百年間祇張驕主以拂諫臣之威而予小人以辱戮君子之具賢士大夫就危殆受污辱者纍纍間有杖一小人者乎無有也至於末流好名沽直之人遂以廷杖爲榮而大書名紙以相誇耀未幾回面易心頓喪其守夫亦素未有以養其廉恥故一折而無所底也唐開元間刺史楊濬坐贓當死上命杖之丞相裴耀卿謂決杖贖死恩則甚優解體受笞事頗爲辱止可施之徒隸不當及於士夫上從之宋太宗以事怒周翰將杖之翰自言臣負



天下才名杖之不雅遂釋之嗟乎此唐宋之君所以享區  
獨永雖或中原俶擾神州陸沉而一跌復興往往能延已  
絕之緒於數十年若明則祚短亡速亂臣賊子接迹於  
世甚至溺將然之灰覆旣破之艦卽求偏安而亦不可得  
豈非士氣盡喪國脉卒斬之明效大驗也哉竊嘗迹明之  
廷杖而觀之故事凡杖者以繩縛兩腕囚服逮午門外每  
入一門門扉隨闔至杖所列校百人衣襖衣執木棍林立  
司禮監宣駕帖訖坐午門西墀下左錦衣衛使坐右其下  
緋而趨走者數十人須臾縛囚定左右厲聲喝喝閣棍則

前明忠義別傳

卷五

四

一人持棍出閣於囚股上喝打則行杖杖之三喝令着實  
打或伺上不測則曰用心打而囚無生理矣五杖易一人  
喝如前每喝環列者羣和之喊聲動地聞者股慄凡杖以  
布承囚四人昇之杖畢舉布擲諸地幾絕者十恒八九司  
禮監錦衣衛使旣分坐左右列校行杖之輕重必察二人  
之語言辯其顏色而黠者則又視其足足如箕張囚猶可  
生靴尖一斂則囚無生理矣而諸惡少年之習行杖者縛  
草爲人二一置磚於中一紙裹其外俱以衣覆之杖置磚  
者視之若輕徐解而觀則磚都裂杖紙裹者視之極重而

紙無傷能如是則入選成化間猶容厚棉重毡正德時逆  
瑾用事則盡褫衣至於御史柳項祭酒柳項侍郎尙書柳  
項此其刑之輕而辱之小者矣君子論明事至此未嘗不  
歎共二百七十餘年之享國爲獨幸也

前明忠義別傳

卷五

五

公諱乾學字天行號自菴山陰人以宛平籍中萬歷己未  
進士選庶吉士授檢討魏忠賢亂政魏廣微以同姓父闖  
得相與羣小相構煽璫勢益橫公感憤時事輒太息流涕  
仰天哭嗚嗚不已與同年吳公裕中深相得吳公官御史  
每朝退即過公論時事及璫黨輒叫號呼天相持痛哭或  
中夜起舞拔劍擊柱砍几聲撼隣壁家人不知驚謂得狂  
疾也廣微生父允貞常為言官以劾閣臣得罪罷天下仰  
其賢廣微甫鄉舉允貞閉之解中不許就禮部試曰此破

前明忠義別傳

卷五

犁犢也一得志必墮我家聲矣灼知其惡如此公遇廣微  
則數數引義規切之毋墜父訓廣微怒甚謂所私曰丁檢  
討獨不欲噉飯耶乃妄斥我為語上公醢豎子耳初天啓  
四年公主試江西惡閹勢之既橫而閣臣如葉向高韓爌  
輩名為清流大都苟自完莫肯出力鋤奸公於是即所為  
程策內發憤痛言之謂中旨頻頒緹騎時下凡再辱士夫  
夫天下亦既虞寺人矣且事變甯可預料漢擾夷狄曹節  
王甫與張角兩亂之唐苦藩鎮仇士良劉季述與王仙芝  
兩亂之當時汪直劉瑾之禍釀之有端去之有術其不可

用枉明甚東陽之委蛇旣不可爲遷健之潔已亦豈得策  
韓文之聲大義固未可盡非乎顧何以如楊一清卒清君  
側奸耶語侃侃不少忌然已觸璫怒降謫在第五至是廣  
微喉璫命錦衣僉事高守謙率中官數十人至第毆殺之  
吳公糾輔臣丁紹軾諂諛不法狀璫怒矯旨杖死闕下烈  
帝御極誅璫置守謙於法贈公侍讀學士再贈禮部侍郎  
吳公贈太僕寺少卿字磊石江夏人

外史氏曰嗚呼古今之以哭稱者阮籍唐衢杜默然皆悲  
憤在一身此鄙夫之猖狂無病而呻吟者也君子不屑道

前明忠義別傳

卷五

七

之矣若公與吳公憂深於杞人而恤大於魯婦非夫涕之  
無從者矣他日賀文忠亦同此意庶幾臨表涕泣之武侯  
千載結知心哉

用... 東... 文... 忠... 亦... 同... 此... 意... 庶... 幾... 臨... 表... 涕... 泣... 之... 武... 侯... 千... 載... 結... 心... 哉

公諱漣字文如號大洪應山人萬歷丁未進士知常熟縣入爲兵科給事中光宗在東朝爲鄭貴妃間希得見神宗不豫公走告閣臣當直宿閣中率百官問疾傳語伴讀王安太子當力請入侍夜無輕出以備非常神宗崩光宗立五日病趣封鄭貴妃皇太后李選侍皇貴妃公上疏力爭以故事得已於是特疏請遺詔中首冊立擇謹愿內臣侍皇太子謂機在防微事在慎始光宗閱奏語皇長子曰此汝忠臣目屬者久之皇長子卽熹宗任內侍魏忠賢傾社

前明忠義別傳

卷五

八

稷者也時年蓋十有六矣光宗崩李選侍據乾清官覲垂簾閉皇長子不聽出公語諸大臣曰宗社事大李選侍非可託少主者遽排闥入闈豎梃交下止不內公攘臂大詬闈者却羣臣隨入哭臨畢問皇長子安在諸璫張口不能對公大呼曰皇長子少汝曹何爲者今何時不急請見顧命大臣何爲者聲徹簾內簾內傳令旨勅簾外嵩呼公抗聲曰簾不撤諸臣不敢拜也顧錦衣帥梁慈目攝之慈登階舉袂命近侍撤簾簾撤選侍退避然猶閉皇長子暖閣中公急呼曰誰敢匿新天子者王安趣入給選侍第一出

皇長子卽返不者諸大臣不能退選侍領之安卽負皇長子出己而選侍中悔使使挽皇長子裾比抵門厲聲猶達外追還者三四至公叱之擁登輿至殿見羣臣正位而後退然而選侍猶據乾清不出也公發憤昌言選侍不當毋天子天子不當託宮嬪選侍能於九廟前殺我則己今日不移宮死不去抗論於朝房於掖門於殿廷者日以十數叱小豎於麟趾門一叱內閣方從哲及大闢於朝者再奮髯叫呼聲淚迸咽選侍乃移仁壽殿皇長子始遷乾清當是時三朝大故變起倉卒舉朝涵涵不知所爲公儼然行前明忠義別傳

卷五

九

顧命大臣之事外戒金吾簡緹騎周廬儼備內戒中官乳母禁宮人闌入身露坐宮門五日夜不交睫頭髮盡白每有大議大臣左右顧視問楊給事云何莫敢專決也移宮旣定羣小滋疾公誣以交關司禮王安欲中傷之遂引疾歸而魏忠賢益用事公雖家居顧念天子冲幼而閹黨之竊弄威福危亂國家也扼腕流涕草疏欲劾之會起都察院左副都御史則於是條次其罪上焉其略曰忠賢木市井無賴中年淨身資入內地初猶爲小忠小信以倖恩繼乃敢爲大奸大惡以亂政祖制以擬旨專責閣臣自忠賢

擅權多出傳奉或徑自內批壞祖宗二百餘年之政體大罪一也劉一燝周嘉謨顧命大臣忠賢交通孫杰論去急於剪己之忌不容皇上不改父之臣大罪二也先帝賓天實有隱憾孫慎行鄒元標以公義發憤忠賢排去之顧於黨護選侍之沈灌曲意綢繆終加蟒玉親亂賊而仇忠義大罪三也王紀鍾羽正功在國本忠賢構黨斥逐不容有正色立朝之大臣太罪四也國家重典無如枚卜忠賢一手握定力阻首推之孫慎行盛以弘更爲他辭以錮其出大罪五也爵人於朝莫重廷推去歲南太宰北少宰皆用

前明忠義別傳

卷五

十

陪惟顛倒銓政掉弄機權大罪六也聖政初新正資忠直乃滿朝薦文震孟熊德陽江秉謙徐大相毛士龍侯震暘等抗論觸忤立行貶黜屢經恩宥竟阻賜環人謂皇上之怒易解忠賢之怒難饒大罪七也然猶曰外廷臣子也傳聞宮中有一貴人以德性貞靜爲皇上寵注忠賢於去年南郊之日託言疾病卽時掩殺是皇上不能保其近倖矣大罪八也然猶曰無名封也裕妃以有妊得封忠賢惡其不附己矯旨勒令自盡是皇上不能保其嬪妃矣大罪九也然猶曰在嬪妃也中宮有慶已經成男乃繞電流虹之

祥忽化爲飛星墮月之慘是皇上不能保其子矣大罪十也先帝在青宮幾四十年所與護持孤危威劫之不動利誘之不變者僅王安一人卽皇上倉卒受命亦不可謂無勞忠賢以私憤矯旨殺之南海子是不但殺王安是敢於殺先帝之老奴略無顧忌大罪十一也今日討獎賞明日討禍額要挾無窮王言屢褻近又於河間府毀人房屋建立禱坊鏤鳳雕龍于霄插漢又不止擅營墓地僭擬陵寢而已大罪十二也今日蔭中書明日蔭錦衣金吾之堂口皆乳臭誥勅之館目不識丁如魏良弼魏良才魏良卿魏前明忠義別傳

卷五

十一

希孔及外甥傅應星等五候七貴何以加茲不知忠賢有何軍功有何相業濫襲朝廷名器大罪十三也用立枷以示威前歲枷死皇親家人數命矣其枷號家人者欲扳陷皇親扳陷皇親者欲動搖三宮當時若非閣臣力持言官糾正椒房之戚又興大獄矣大罪十四也良鄉生員章士魁以爭煤窰傷其墳脉託言開礦處死假令盜長陵一抔土何以處之趙高指鹿爲馬忠賢指窰爲礦大罪十五也諸生伍思敬胡遵道果否侵占牧地宜付有司乃收禁拷掠體無完膚皇上方臨雍視學而忠賢草菅士命使青燐



赤壁之氣先結於澤宮泮水之間大罪十六也科臣周士  
樸原是在工言工忠賢停其陞遷使吏部不得專銓政言  
官不敢司封駁大罪十七也北鎮撫劉僑不肯殺人媚人  
原是在刑言刑忠賢惡其不善鍛鍊徑行削籍明示律令  
可以不守而忠賢之意旨不可不遵大罪十八也科臣魏  
大中到任奉有明旨忠賢忽傳旨詰責及大中回奏復奉  
旨供職煌煌天語提起放倒大罪十九也東廠係察奸非  
擾平民自忠賢受事恣行傾陷雞犬不甯縱傳應星陳居  
敬傳繼教輩投匭設阱片語稍違駕帖立下如近日拏中  
前明忠義別傳 卷五 三

書汪文言不從閣票不令閣知而傳應星等造謀造逆勢  
不至與同文之獄刊黨錮之碑不已者大罪二十也邊徼  
未靖內外戒嚴東廠所緝何事前奸細韓宗功潛入都門  
打點實主忠賢司房之家事露始去假令天不悔禍宗功  
事成不知九廟生靈安頓何地大罪二十一也祖制不畜  
內兵原有深意忠賢與奸相沈淮創立內操招納亡命安  
知無大盜刺客爲敵國窺伺者竄入其中一旦變生肘腋  
可爲寒心大罪二十二也忠賢進香涿州警蹕傳呼清塵  
塾道人以爲駕至及其歸也改駕四馬羽幢青蓋夾護環

遮則已儼然乘輿矣大罪二十三也寵極則驕恩多成怨  
今春間魏忠賢走馬御前皇上射殺其馬忠賢不自伏罪  
進有傲色退有怨言朝夕提防介介不釋從來亂臣賊子  
止爭一念放肆遂至不可收拾奈何養虎兇於肘腋間乎  
此又寸磔忠賢未足盡其辜者大罪二十四也凡此逆迹  
昭然在人耳目乃內廷黨護而不肯言外廷畏禍而不敢  
奏更有無恥之徒託身門下逢其所喜挑其所怒內有受  
而外發之外有呼而內應之或內廷奸狀敗露則有奉聖  
夫人客氏爲之彌縫積重所移積勢所趨舉朝內外但知  
前明忠義別傳

卷五

三

有忠賢不知有皇上卽如忠賢已往涿州一切本章必星  
夜馳請票擬待忠賢回日始敢發批天顏咫尺不容裁決  
而馳候忠賢於數百里之外事勢至此尙有天日耶羽翼  
已成騎虎難下及今不治不知宗社何所託也疏入忠賢  
持不下佯辭厥乞罷上慰留之而徐出嚴旨切責公公憤  
激欲理前疏對仗忠賢詞知邊帝不御朝者三日己而御  
皇極門衛侍森列刀劍倍常時侍班官僚益嚴警左班官  
毋得輒出奏當此之時公憤愈甚而南北科卿寺數十百  
人前後申奏俱爲忠賢持以罪去先是羣小黨忠賢謀盡

逐衆正科臣傅樾疏論左公光斗魏公大中交通汪文言  
比暱匪人詔下文言於獄廷杖革職左魏二公疏辯得免  
至是御史梁夢環復論文言而大理寺丞徐大化劾公與  
左公等招權納賄藉文言入罪以傾之文言者徽人以監  
生工書授中書舍人負氣有聲公卿間遂目爲東林之黨  
再下鎮撫獄鍛鍊兩月餘弗承刑益酷其甥悲失聲文言  
叱曰孺子眞不才死豈負我哉而效兒女子泣耶卒不承  
鎮撫司許顯純勒令誣公等以賊文言蹶起曰天乎冤哉  
以此讎清廉之士有死不承顯純相與謀曰不引移官則  
前明忠義別傳

卷五

罪名不大不借封疆難與追賊於是爲讞獄之辭曰移官  
建議爲立名蹟等之資整頓鈔政爲偏聽招權之藉布買  
命之金而楊熊之刑停敢賄賂之門而陞遷之法濫逮公  
等下鎮撫獄訶詬百出裸體辱之五毒備至見者無不切  
齒流涕而顯純拷掠猶懼不當忠賢意也公逮時哭送者  
數萬人壯士劍客聚而謀篡奪者幾千人所過市集攀檻  
車看忠臣及炷香設祭祝生還者自豫冀達荆吳綿延萬  
餘里老嫗菜傭瞽乞兒各爭持一錢爲贈許州有舊識  
郎中蘇繼歐通謁具飯後被偵削奪自經死公歷事三朝

親受顧命自下獄體無完膚及其死也土囊壓身鐵釘貫耳僅以血濺衣裹置棺中櫬歸無葬地置於河側母妻俱棲息城樓撫按猶日夕追賊也烈帝誅璫追錄死闖忠臣以公爲首詔贈右都御史加贈太子太保謚忠烈蔭子與祭葬

外史氏曰嗚呼公區區一曹郎非有貴戚肺腑之親大臣心膂之重直以光宗病中之詔奉爲顧命之尊身先勲舊大臣攘臂疾呼奪天下於婦人之手而歸之主器擎天捧日當無與公比烈者矣以故沖人亦歎爲忠臣舉朝交欽前明忠義別傳

卷五

五

其大節然而移宮之諍國是雖定而禍卽釁焉遂至逆閹主烹羣小行愀連染三案並及邊鎮長城旣燬盜賊遂橫國祚卒斬殃禍未竟吁嗟悲夫斯豈曰命乎

左忠毅傳

公諱光斗生之夕月宿在斗因以名字共之號滄嶼桐城人萬歷丁未進士授中書舍人擢御史與楊公漣魏公大中袁公化中周公朝瑞顧公大章同時罹瑞禍世所稱六君子者也而楊左之名震天下公豪邁負氣敢言光宗崩熹宗冲幼李選侍據乾清宮公語楊公曰苟以驪姬良娣而攬雉壘之權禍豈止於歸胙寶鞍入彘房州而已乎乃上疏立請移宮大略曰內廷之有乾清宮猶外廷之有皇極殿也惟皇上御天居之惟皇后配天得其居之選侍非

前明忠義別傳

卷五

七

母居正宮而殿下居慈慶不得守几筵行大禮名分倒置不早決斷將借撫養之名行專制之實武氏之禍復見於今矣疏上楊公抗章繼之選侍大怒急召公公不爲動曰天子耳目之官非天子宣不敢奉從容出袖中鎖鑰付楊公曰光斗命盡於此矣選侍不移宮光斗亦不立螭頭下也楊公叱中官使回奏公得免越二日選侍移仁壽上還乾清中外始大安尋遷大理寺丞進少卿陞都察院左僉都御史當此之時以前光宗登極詔收召天下名碩司銓則趙公南星李公騰芳陳公于廷司憲則鄒公元標孫公

瑋高公攀龍司垣則魏公大中司道則袁公化中周公宗  
建考功則鄒公維璉程公國祥並矯志澄清而魏廣微崔  
呈秀等特不便也會魏忠賢與乳媪客氏私方怙寵用事  
忌外廷特甚則廣微等附進百官圖指數之曰去是數人  
者萬歲矣於是卿寺有名者盡削籍公與楊公亦以劾闕  
奪官去而移宮之禍並發矣王安者光宗舊侍也外廷爭  
選侍移宮頗資爲助性方嚴數數懲忠賢忠賢憾次骨旣  
矯旨殺之中書汪文言與安交文言遊公卿間久則於是  
撫文言以交通奸利律並矯旨逮諸臣以及公當是時公  
前明忠義別傳

卷五

父封大夫年八十公年五十命奚奴扮楊忠愍寫本赴西  
市諸劇前爲壽己又引范滂母語數數誦說於其母夫人  
之前初服拜堂下冀以慰解之兩尊人亦爲進一觴也至  
京下鎮撫司獄坐賊拷掠無完膚歿前一日從茗椀中書  
數語示弟曰辱極汗極痛極死矣死矣如二親何竟與楊  
公等駢死獄中是夕長虹亘天里中星隕如斗三日屍出  
肢骸穿裂面目如生櫬未及門而追賊之檄下矣舉家繫  
累死者數十人斥賣田廬略盡不足則及兄弟之產又不  
足則及異姓以至三族十族無人免者崇正改元誅璫贈

公都察院右副都御史太子少保官一子予祭葬謚忠毅  
贈三代如其官封大夫猶及見之也初公之下獄也史公  
可法者公督學京畿時首拔士也朝夕獄門外逆闔防伺  
甚嚴雖家僕不得近久之聞公被炮烙且夕且死持五十  
金涕泣謀于禁卒卒感焉使史公更敝衣草屨背筐手長  
鏡爲除不潔者引入微指公處則席地倚牆而坐面額焦  
爛不可辨膝以下筋骨盡脫矣史公前跪抱公膝而嗚咽  
公辨其聲而目不可開乃奮臂以指撥皆日光如炬怒曰  
庸奴此何地也而汝來前國家之事糜爛至此老夫已矣

前明忠義別傳

卷五

六

汝復輕身而昧大義天下事誰可支拄者不速去無俟奸  
人構陷吾今卽撲殺汝因摸地上刑械作投擊勢史公噤  
不敢發聲趨而出常流涕述其事以語人曰吾師肺肝皆  
鐵石所鑄造也公視學京畿時一日風雪嚴寒從數騎出  
微行入古寺廡下一生伏案臥文成草公閱畢卽解貂覆  
生爲掩戶叩之寺僧則史公可法也及試吏呼名至史公  
公瞿然注視呈卷卽面署第一召入使拜夫人曰吾諸兒  
碌碌他日總吾志事惟此生耳史公後果以閣部督師死

國難





公諱大章字伯欽號塵客常熟人萬歷二十五年進士授  
泉州府推官移病免歸改常州府儒學教授稍遷國子監  
博士陞刑部主事歷員外郎調兵部復調禮部廣甯之失  
也經略熊廷弼與巡撫王化貞議戰守不合致敗並逮下  
獄刑尙書王公紀謂非公不能辯此獄留署山東司主讞  
公惜熊公才議貰之責後效謂誅心則廷弼難末減論事  
則化貞實罪魁兩人不當同科楊左諸公皆至之然以衆  
議堅不能奪卒定經撫同辟出爲陝西按察司副使魏忠

前明忠義別傳

卷五

三

賢亂政羣小謀殺楊左諸公逮汪文言下獄以其言爲徵  
拷掠無所得聚而謀曰經撫之獄顧大章引入議議熊廷  
弼廷弼楚人也大章楊左之黨也以驚獄坐顧以關通坐  
楊左則一網盡矣遂矯旨逮繫與楊左等六人並下鎮撫  
獄當時號爲六君子者也竟坐受廷弼賊五人先後拷死  
移公刑部議罪公對簿曰某奉旨送法司據招定罪豈容  
復辯辯則抗旨不辯則欺本心欺法司且欺天下後世亦  
欺皇上也不抗卽欺無一而可且五人者旣死矣借大章  
以實五人之招是大章旣自誣服又代五人誣服何以見

五人地下乎明公能雪此案萬代瞻仰不然有鎮撫司原  
案在復何言法司環坐愕眙莫敢異同也已而復移送北  
司公歎曰注文言猶能爲質高我獨不能乎吾不可再辱  
矣呼酒與弟訣別趣和藥飲之不死雉經而卒初六人下  
獄獄中神祠木忽生黃芝視之六瓣也獄吏以賀公歎曰  
芝瑞物也而困於獄吾六人共以此終乎爲偶語曰故作  
風波翻世道長留日月照人心曰此他日祠堂聯也死之  
夕大風雷雨如注逆璫外舍及廣微寓宅屋瓦飄盡樹木  
拔去城外數十里椅桌隨之室內爲之一空其妻披衣立

前明忠義別傳

卷五

五

雨中隱隱望見旌旗羽蓋金牌燈火如大官衆者行其室  
上而廣微曰我爲宰相內倚上公如天之德何妖鬼之爲  
祟小人之不畏天如此公坐急徵厥衛邏卒如織弟大武  
傾身入長安職內橐饘周旋難險無所避一夕垣中白氣  
亘北斗大武故諳星象指而泣曰諸君子其皆不免乎已  
而楊左六公並命大武護公喪歸益自放於酒謂天下將  
亂吾衰矣無以自見生可厭而死可樂也遂發病卒  
外史氏曰嗚呼諸君子之死以門戶也固也然不借封疆  
則死無名不坐廷弼賊則罪不著然則諸君子非以門戶

死也蓋魏璫無大憾於廷弼特假以殺諸君子既殺諸君子卽不得不並殺廷弼此廷弼之所以死而諸君子所以一網盡歟不然失地喪帥之王化貞罪浮於廷弼多矣何以獨追死哉方廷鞠廷弼時大司寇喬允升謂廷弼有存遼功當議而魏忠節力持不可公亦卒定廷弼辟而終以廷弼死豈天生廷弼特予璫以殺諸君子之資而天生諸君子又致廷弼以必死之路與嗚呼門戶之禍延及封疆白馬清流不烈於此矣公念朝士各持門戶思有以解之棋酒謔浪自託於賈彪之西行而卒嬰其難曲突徙薪之前明忠義別傳

卷五

五

人受焦頭爛額之慘而骨且與之同燼君子之生斯世也其亦何若而可哉

魏忠節傳

公諱大中字孔時號廓園嘉善人萬歷丙辰進士官行人  
陞工科給事轉禮科晉吏科都給事冢宰趙公南星知公  
賢每事輒咨訪所薦引皆海內人望朝士不能得趙公意  
率怨公公又引會典裁抑郵典之濫甚者忌者滋怒公給  
事中章允儒曠同官傅櫬假汪文言發難魏忠賢主之欲  
盡逐衆正禍且作矣而楊公漣疏劾忠賢二十四大罪既  
上公亦率同列交章應之其言曰自古亂人家國者有男  
戎又有女戎兩者往往相比而成姦故古者聖王在上宦  
前明忠義別傳 卷五 重

者不得交通禁近干預政事是以朝廷清明萬殊蒙福今  
逆豎魏忠賢私結奉聖夫人客氏擅作威福操縱生殺首  
殺王安以樹威於內繼逐劉一燝周嘉謨王紀以樹威於  
外近且驚三戚畹家人以樹威於宮禁又未已也懷冲太  
子胡爲不育裕妃胡以革封皇上前郊之目胡貴人又胡  
以無病暴卒皇上身爲天子致三宮列嬪盡寄性命於忠  
賢客氏能不寒心又况出入警蹕僭擬乘輿不軌不法逆  
謀大著致漣不惜粉身碎首爲陛下力陳今忠賢種種異  
狀陛下悉引爲親裁代之任咎恐忠賢所得溫旨卽出忠

賢手而漣之疏陛下且未及省覽也陛下謂宮禁嚴密外  
廷安知枚乘有言欲人弗知莫若弗爲未有爲其事而他  
人不知者又謂左右屏而聖躬將孤立夫陛下一事大小  
臣工所擁衛何藉於忠賢若忠賢容氏一日不去恐禁庭  
左右悉忠賢容氏之人陛下眞孤立于上耳忠賢得疏大  
怒而魏廣微以同姓父事忠賢致揆地趙公以通家子待  
之頗峻每歎曰見泉無子見泉廣微父號也廣微憾之次  
骨公又數忤廣微會孟冬時享廣微偃蹇後至公抗疏劾  
之則廣微益與忠賢合於是羣姦煽搆捉刀蜚矢飛謀鉤  
前明忠義別傳

卷五

五

謗正人君子無一得免者矣謝應祥者清流也晉撫員缺  
趙公推應祥廣微以應祥曾令嘉善首拔公遂曠陳九疇  
劾公出應祥門推舉不公降調出外趙公亦得罪去明年  
逆黨梁夢環復劾文言再逮下獄趙公與繆昌期王公之  
宗輩無所不牽引而以公與楊左諸公爲受熊公廷弼賄  
矯旨逮問是日雷電交作風吼水立士民匍匐水中泣送  
者數萬人過蘇州周忠介公結姻去過無錫高忠憲公送  
高橋至常州太守會櫻餽以贐辭不受曰譬如發婦孀扈  
數十年垂死中動一念便屬失節簞華而睨不敢以此易

也公爲孝廉十餘年貧甚居湫巷數椽不蔽風雨舌耕不足自給欣然意足居官不以家自隨二蒼頭給爨而已入朝則鍵其戶寂無一人有外吏以苞苴至舉發之自是無敢及其門者其清風亮節如此逮至京下鎮撫獄誣賊拷掠備至受殊刑未死獄吏卷以藁薦倒豎之地三日啟視目睛炯炯若穀之轉輪旣死璫毀其屍故公骸骨未全子學泖旦暮哀號水漿不入口亦死學濂甲申亦死於難俱有傳公贈太常卿謚忠節

外史氏曰嗚呼士生於有明之世何其不幸也一焚爇於

前明忠義別傳

卷五

五

永樂之篡逆再殘殺於王振之專恣三屠毒於劉瑾之擅權四戮辱於興獻之議禮五斬艾於嚴嵩世蕃之濟惡至忠賢則爪牙鷹犬開千古廷尉所未設之刑節義忠良受千古人臣所未經之痛歷選前世未有一姓之代祖孫父子相臣闔寺或數年或十數年上下相承一心並力害士如此之亟者也夫以永樂酷虐享國靈長己非所宜况繼之以屢葉又甚之以逆闖乎天地之正氣不隨世運爲漸滅故終明之亡薦紳巾幘以逮廝養傭丐捐軀赴義者遍迹前古此數窮理極造物特生是人以扶植綱常而明適

逢其盛或且謂明得養士之報矣

前明忠義別傳

卷五

美



袁中愍傳 附夏之令


公諱化中字熙宇武定州人萬歷丁未進士歷官河南  
御史陳言時事之漸可憂者入曰宮禁漸弛言路漸壅法  
紀漸替賄賂漸廣邊疆漸壞職掌漸失宦官漸盛人心漸  
絕忤璫意會楊忠烈疏劾忠賢降旨切責公復言忠賢之  
惡外廷久知之特上未之知耳遂力陳忠賢諸奸逆狀璫  
益怒逮鎮撫獄百慘俱備大呼列祖宗而死死之夕獄  
中鬼數百啾啾泣號大風四作屋瓦皆飛衆鬼捫禭撫用  
刑胥投諸廁廼時皆死夏公之令字伯先光州人公同年  
進士拜四川道御史亦以忤璫逮繫拷掠大辱高皇帝西  
死初魏廣微阿璫作黠將錄方秉燭牖列諸公姓名時忽  
怪風滅燭空中隱隱呼冤者再廣微怒命婢復燃燭操筆  
曰我不冤汝將冤我矣竟書之而諸公死公贈太僕少  
卿謚忠愍夏公亦贈太僕少卿

外史氏曰嗚呼害正而黨邪鬼固不人若也然不以較璫  
且不較衛公等以不死何耶豈璫焰方張鬼神亦且避  
之耶抑諸公之考終命者屍宜以獄解鬼固不能衛之  
卽群小亦非能致之死耶

前明義別傳

卷五

七



卷五終



